



PL
2455
H682
1672
v.10

梁昭明文選卷之十

明吳郡張鳳翼纂註

延陵吳芝校訂

解嘲

并序雄但知誚時人攀附丁傳董賢之為非而不知他日為莽大夫有甚於此所謂泊如自守卒成虛說以此為嘲不知當何以解也

楊雄

哀帝時丁傳董賢用事

丁明傳晏

諸附離之者起家至二

于石

附離即附麗言攀緣也

時雄方草創太玄有以自守泊如

也

太玄經也泊如謂淡泊無為也

人有嘲雄以玄之尚白

玄當黑而尚白將無

所用而雄解之號曰解嘲其辭曰

客嘲楊子曰吾聞上世之士人綱人紀不生則已生

必上尊人君下榮父母析人之珪儋人之爵懷人之

符分人之祿

析分也珪諸侯所執也儋荷也符信也亦貴者所執也

紆青拖紫

朱丹其轂

公侯紫綬九卿青綬吏二千石朱兩轡以朱色飾其車轂也

今吾子幸

得遭明盛之世處不諱之朝與羣賢同行歷金門上

玉堂有日矣

不諱謂無所忌諱言時清也金門天子門也玉堂天子殿也有日言久也曾

不能畫一奇出一策上說人主下談公卿目如耀星

舌如電光一從一橫論者莫當

電光謂辭辯速如電光之閃也言雄不如

此顧默而作太玄五千文枝葉扶疎獨說數十餘萬

言以樹喻文也深者入黃泉高者出蒼天大者含元

氣細者入無間無間言至微也太玄經文意有深高大小如此然而位不過

侍郎擢纔給事黃門意者玄得無尚白乎何為官之

拓落也拓落猶遼落不偶也楊子笑而應之曰客徒欲朱丹吾

轂不知一跌將赤吾之族也往者周網解結羣鹿爭

逸離為十二合為六七四分五剖竝為戰國十二謂魯衛齊

宋楚鄭燕韓魏秦中山也六士無常君國無定臣言謂齊燕楚韓魏趙及秦為七

臣數遷得士者富失士者貧矯翼厲翮恣意所存言人

易不常擇君而事之如鳥舉翼振翮而恣意高飛也故士或自盛以橐或鑿坏以

遁范睢入秦藏於橐中顏闔不受魯聘鑿坏而遁坏音來切屋後墻也是故鄒衍以頡

頡而取世資頡音挈頡頡高抗之意鄒衍為人雖高抗尚令世人取之以為資孟軻

雖連蹇猶為萬乘師連蹇即淹蹇之意連去聲今大漢左東海右

渠搜渠搜屬雍州在金城河間之西前番禺在南故後陶塗漁陽之地在北

故曰東南一尉西北一候候所以伺候遠國來朝之賓亦官也徽以糾

墨製以鑽鈇糾墨鑽鈇皆刑法名徽繫也製裁也散以禮樂風以詩書

曠以歲月結以倚廬漢律不為親行三年服不得選舉故云倚廬結以結其心也

是以天下之士雷動雲合魚鱗雜襲咸營於八區家

家自以為稷契人人自以為臯陶戴縑垂纓而談者

皆擬於阿衡

繼所氏切繼纓皆冠上飾也言冠冕之士凡有所談說者皆自擬於伊尹也

五尺童子羞比晏嬰與夷吾當塗者升青雲失路者

委溝渠旦握權則為卿相夕失勢則為匹夫譬若江

湖之崖渤澥之島乘鴈集不為之多雙鳬飛不為之

少

四鴈曰乘言朝廷得士不足為輕重也

昔三仁去而殷墟二老歸而

周熾

比干箕子微子為三仁伯夷與太公為二老

子胥歿而吳亡種蠡存

而越霸

吳王不用伍子胥後亡其國越王用大夫種范蠡二人而為霸主

五穀入而

秦喜樂穀出而燕懼

五穀百里奚也燕懼言穀奔趙之後燕為齊所破也

范雎

以折摺而危穰侯

魏齊答擊范雎折脅拉齒後入秦說秦王逐穰侯遂相秦為應侯

蔡澤以噤吟而笑唐舉

噤吟俱去聲卽囁嚅之意蔡澤就唐舉相舉笑曰聖人無

相其殆子乎笑爲唐舉所笑也

故當其有事也非蕭曹子房平勃樊

霍則不能安當其無事也章句之徒相與坐而守之

亦無所患故世亂則聖哲馳驚而不足世治則庸夫

高枕而有餘夫上世之士或解縛而相或釋褐而傳

左傳齊殺子糾管仲請囚鮑叔受之及堂阜而脫之歸以告曰管夷吾治於高後使相可也公從之墨子曰傳說被褐帶索庸樂傳

巖武丁得之舉以爲傳

或倚夷門而笑

侯嬴也

或橫

江潭而漁

漁父也

或七十說而不遇

孔子

或立談而封侯

虞卿說趙孝成王再見爲趙上卿食邑於虞

或枉千乘於陋巷

呂氏春秋曰齊桓公

見小臣稷一日三至弗得見從者曰萬乘之主見布衣之士一日三至而不得見亦可以止矣桓公曰不然士傲爵祿者固輕其主君傲霸王者亦輕其士從夫子傲爵祿吾庸敢傲霸王乎或擁篲而先驅方士傳言鄒子在燕諸侯畏之皆郊迎擁篲是以士頗得信其舌而

奮其筆信與伸同室隙蹈瑕而無所詘也室隙蹈瑕言輕折挫也當

今縣令不請士郡守不迎師羣卿不揖客將相不俛

眉言奇者見疑行殊者得辟言世尚同而惡異辟罪也是以欲談

者卷舌而同聲欲步者擬足而投跡嚮使上世之士

處乎今世策非甲科行非孝廉舉非方正獨可抗疏

時道是非高得待詔下觸聞罷又安得青紫史記曰歲課甲

科為郎中乙科為太子舍人抗疏有所觸犯者帝報聞而罷之言不任用也

且吾聞之炎

炎者滅隆隆者絕觀雷觀火為盈為實天收其聲地

藏其熱高明之家鬼瞰其室

觀雷聲火光但見其熱盛莫測其所以忽然天

收其聲地藏其熱則不聞見矣此盛必衰之義也攫

九挈

女

者亾默默者存

攫挈執持也言執權用勢者必亾默默守道者必存也

位極者高危自守者身全是故知玄知默守道之極

爰清爰靜游神之庭惟寂惟漠守德之宅

庭宅謂精神道德之

所居處

世異事變人道不殊彼我易時未知何如

言若使古

人易居今世我又易處昔時亦未知勝否何如

今子乃以鵷臯而笑鳳凰執

子

五

顛欺甚切頰鼻莖也於達切沫洒面也咽嗑也音益言澤醜貌也澤能入秦高揖范睢而說之奪其相位

以得時也天下已定金革已平都於洛陽漢高祖也婁敬委輅

胡脫輓輓掉三寸之舌建不拔之策舉中國徙之長

安適也漢書婁敬戌隴西過洛陽高帝在焉說曰陛下都洛陽不便不如入關據秦之固是日車

駕西都長安輅謂以木當胸以輓車委輅脫輓言敬方委車而獻說也適會逢其適也五帝垂

典三王傳禮百世不易叔孫通起於枹夫鼓之間解

甲投戈遂作君臣之儀得也得得呂刑靡敝秦法酷

烈聖漢權制而蕭何造律宜也尚書呂命序曰穆王訓夏贖刑故曰呂刑

靡壞也言秦為酷暴漢興而故有造蕭何律於唐虞

之世則諄矣

諄垂也言時宜不同

有作叔孫通儀於夏殷之時

則惑矣有建婁敬之策於成周之世則垂矣有談范

蔡之說於金章許史之間則狂矣

金日磾張安世許廣漢史恭史高為

金張許史皆漢貴盛族也

夫蕭規曹隨

蕭何作規度而造律法曹參隨而行之

留侯

畫策陳平出奇功若泰山嚮若坻隤雖其人之瞻智

哉亦會其時之可為也

天水有大坂名曰隴坻其山堆傍著崩落作聲聞數百里

故曰坻隤坻丁禮切瞻足也

故為可為於可為之時則從

本可為而為則

君臣不相違言必從計必用也

為不可為於不可為之時則凶

事本不可

為而彊為之謂不適時也

若夫藺生收功於章臺

藺相如完壁事也

四皓

采榮於南山

四皓東園公角里先生綺里季夏黃公采榮采取榮名也

公孫創業

於金馬驃騎發迹於祁連

公孫弘對策於金馬門驃騎將軍霍去病擊匈奴至

祁連山捕首虜甚多

司馬長卿竊貲於卓氏東方朔割炙於細

君

史記文君夜奔相如卓王孫不得已分予文君僮百人錢百萬為富人居漢書伏日詔賜從官肉太

官丞日宴不來東方朔獨拔劒割肉即懷肉去太官奏之上曰先生起自責也朔曰受賜不待詔何無禮也拔劒割肉一何壯也割之不多又何廉也歸遺細君又何仁也上笑曰使先生自責乃反自譽復賜酒一石肉百斤相如以琴挑文君僕誠不能與此數子故言竊炙熟肉也細君謂妻也

竝故默然獨守吾太玄

○答賓戲 并序

班固

永平中爲郎典校祕書專篤志於儒學以著述爲業
或譏以無功又感東方朔楊雄自喻以不遭蘓張范
蔡之時曾不折之以正道明君子之所守故聊復應
焉其辭曰

賓戲主人曰蓋聞聖人有一定之論烈士有不易之
分亦云名而已矣唯貴得名耳故太上有立德其次有立

功左傳叔孫豹之辭也

夫德不得後身而特盛功不得背時而

獨彰○是以聖哲之治○棲棲遑遑○孔席不暖○墨突不黔○

巨炎反棲棲遑遑憂時之不濟也席不暖臥不安也突不黔不暇食也孔謂孔子墨謂墨翟也突竈孔也黔黑也不暇食故不黑也由此言之○取舍者○昔人之上務○著作者

前烈之餘事耳○取舍謂進退也今吾子幸游帝王之世○躬帶

紱冕之服○浮英華○湛道德○莫龍虎之文○舊矣○英華喻帝

德也浮沉言其洋溢可游泳也湛古沉字晉被也謂被龍虎之衣也舊久也卒不能攄首

尾○奮翼鱗○卒終也攄舒也言其終不能似神龍舒其首尾振其翼鱗以游於高遠也振拔

滂塗○跨騰風雲○使見之者影駭○聞之者嚮震○徒樂枕

經籍書○紆體衡門○上無所蒂○下無所根○蒂都計切紆屈也衡門貧

賤之居也上下無根蒂謂無援也

獨攄意乎宇宙之外銳思於毫芒

之內潛神默記絙以年歲

毫芒細小也言慮盡大小以成其文章也

然而

器不賈

古

於當已用不効於一世

當已乃願市此貨者所謂當家也

雖馳辯如濤波摘藻如春華猶無益於殿最也

摘布也藻

水草之有文者上功曰最下功曰殿

意者且運朝夕之策定合會之計

使存有顯號亾有美謚不亦優乎

朝夕之策謂日前之計也

主人

迫爾而笑曰

迫寬舒之貌讀若悠

若賓之言所謂見世利之華

聞道德之實守窆奧之熒燭未仰天庭而覩白日也

西南隅謂之奧東南隅謂之窆窆一吊切熒小光也

曩者王塗蕪穢周失其馭

曩昔也

侯伯方軌戰國橫騖

音務方併也軌轍也

於

是七雄虓

乎交

闕分裂諸夏龍戰虎爭

虓闕猛烈也

游說之

徒風颭雷激竝起而救之

颭風吼也颭音庖雷激謂口辯疾急也救之謂救諸

侯之危也

其餘焱

必遙

飛景附雪煜

育

其間者蓋不可勝載

焱古燹字雪音畢雪煜其間相為炫耀扇揚也

當此之時搗朽磨鈍鉛刀皆

能一斷

搗磨皆自激厲也言當此之時不才者亦激厲以求僥倖如鉛錫之刀能一斷割蓋亂世

易為才也

是故魯連飛一矢而蹶千金

齊圍燕燕將保聊城魯仲連為書繫

矢射之燕將燕將得書泣而自殺蹶蹶也

虞卿以顧盼而捐相印

秦昭王遺趙王

書持魏齊頭來魏齊出見趙相虞卿虞卿度趙王終不可說乃解其印與魏齊間行

夫啾發

投曲感耳之聲合之律度淫擺鳥佳而不可聽者非韶

夏之樂也歌曲也浮擺不正也因勢合變偶時之會

風移俗易垂迂而不可通者非君子之法也言人因權勢合

於變通為風俗所移易而垂迂於道不可通於政體非賢哲之法也及至從人合之衡

人散之從人謂蘓秦合六國以備秦也橫人謂張儀佐秦散六國之從使事秦也亡命漂

說羈旅騁辭亡命謂逃命若范雎去魏也羈旅謂客游不得志也漂說謂浮詭之言騁辭謂

馳辯皆欲感動人君也商鞅挾三術以鑽孝公三術謂帝道王道霸道鑽者取

必人李斯奮時務而要始皇奮發也時務謂當時之急務彼皆躡

風塵之會履顛沛之勢據微乘邪以求一日之富貴

言據微倖乘邪險以求富貴也

朝為榮華夕為顛頓福不盈眚

齊細禍

溢於世凶人且以自悔况吉士而是賴乎且功不可

以虛成名不可以偽立韓設辯以激君呂行詐以賈

古國

凶人謂商鞅輩臨死敗皆悔恨之吉士班固以目託也韓韓非也呂呂不韋也賈國以商賈之

術得說難既適其身乃囚

韓非作說難欲以為天下法上書既終而為李斯所

疾囚而死適終也

秦貨既貴厥宗亦墜

呂不韋以子楚為奇貨謀得嗣秦後不韋

竟以遷死

是以仲尼抗浮雲之志孟軻養浩然之氣彼豈

樂為迂濶哉道不可以貳也方今大漢洒埽羣穢夷

險芟荒

謂翦除暴亂也夷平也

廓帝紘恢皇綱

廓開也恢大也言開大五帝三

皇之綱紀也

基隆於羲農規廣於黃唐

羲伏羲也農神農也規規矩也黃黃

帝也唐唐堯也

其君天下也炎之如日威之如神函之如海

養之如春是以六合之內莫不同源共流

同源共流謂同奉天

子之化也

沐浴玄德稟仰太龢枝附葉著譬猶草木之植

山林鳥魚之毓川澤得氣者蕃滋失時者零落

蕃滋盛也

參天地而施化豈云人事之厚薄哉今吾子處皇代

而論戰國曜所聞而疑所覲

吾子謂賓也曜誇也

欲從整

毛敦

而度高乎泰山懷沈濫

音檻

而測深乎重淵亦未至也

敦音頓丘也沈泉玄出也濫泉正出也喻賓以小見欲窺我大道亦如小丘小泉度量泰山之高海水之

也深

賔曰若夫鞅斯之倫衰周之凶人既聞命矣敢問

上古之士處身行道輔世成名可述於後者默而已

乎主人曰何為其然也昔者咎繇謨虞箕子訪周言

通帝王謀合神聖

咎繇為舜謨武王訪箕子

殷說夢發於傅巖周

望兆動於渭濱

殷高宗夢帝賚良弼乃得說於傅巖之野周文王卜兆遇得太公望於渭

水之

齊寧激聲於康衢漢良受書於邳垠

音銀寧感飯牛康衢

擊車輻而歌桓公得之五達曰康四達曰衢張良步

游下邳圯上有一老人出一編書曰讀是則為王者

師邳地名

皆俟命而神交匪詞言之所信故能建必

垠涯也

然之策展無窮之敷也

俟待也言上四人皆待天命神交匪言說之相信故能立

必成之計申其大功也展申也近者陸子優游新語以興董生下帷

發藻儒林高帝謂陸賈曰試為我著秦所以失我所以得之者何陸賈乃祖述存亡之徵凡著

十二篇號曰新語董仲舒以治春秋為博士下帷講誦弟子莫見其面發藻謂著春秋繁露也劉向

司籍辯章舊聞楊雄譚思法言太玄司主也籍書籍也劉向校經傳

諸子詩賦每一卷書已向輒條其篇目撮其旨意錄而奏之楊雄譚思渾天文謨十二卷象論語號曰法

言渾天即太玄經也譚深也皆及時君之門闡究先聖之壺奧宮中

巷謂之壺婆娑乎術藝之場婆娑偃息也場圃講經藝之處也休息乎篇

籍之囿以全其質而發其文用納乎聖德烈炳乎後

人斯非亞歟亞次也言次於傳說太公之徒若乃伯夷抗行於首陽

柳惠降志而辱仕。顏淵樂於簞瓢。孔終篇於西狩。春秋

哀公十四年春魯西狩獲麟。聲盈塞於天淵。真吾徒之師表也。且

吾聞之一陰一陽。天地之方。方猶常也乃文乃質。王道之

綱。有同有異。聖哲之常。故曰慎修所志。守爾天符。委

命供已。味道之腴。文子曰不言之師不道之道若或通焉謂之天符供猶全也腴膏腴

也言研味道德之膏腴天符天性也神之聽之。名其舍諸。毛詩曰神之聽之武穀以

汝言神必錫以榮名也賔又不聞和氏之璧。韞於荆石。隨侯之

珠。藏於蚌蛤乎。歷世莫眊。不知其將含景曜。吐英精

曠千載而流光也。韞藏也言璧藏石中珠在蚌內歷世莫見及剖之則景曜英精遠而

有光應龍潛於潢汙魚鼃媒之天有九龍應龍有翼小水謂之潢不洩謂之汙

媒謂欺慢也不覩其能奮靈德合風雲超忽荒而躔昊蒼

也故夫泥蟠而天飛者應龍之神也先賤而後貴者

和隨之珍也先賤謂在石蚌時也後貴謂剖之也時暗而久章者君子

之真也言君子懷德雖初時未見用後終顯也若乃牙曠清耳於管絃

離婁眇目於毫分逢蒙絕技於弧矢般輸摧巧於斧

斤摧猶竭也良樂軼能於相駁烏獲抗力於千鈞和鵲發

精於鍼石研桑心計於無垠左傳晉侯求醫於秦秦伯使醫和視之鵲扁鵲

也研計然之名也桑桑弘羊也以心計為侍中走亦不任厠技於彼列故密

爾自娛於斯文

密靜也走主人自稱也廁間也彼列謂牙曠研桑之徒也

辭

○秋風辭

并序帝行幸河東祠后土顧視焉
京欣然中流與羣臣飲燕歡甚作

漢武帝

秋風起兮白雲飛
草木黃落兮鴈南歸
蘭有秀兮菊有芳
攜佳人兮不能忘
泛樓船兮濟汾河
橫中流兮揚素波
大船上施樓故號曰樓船
簫鼓鳴兮發棹歌
歡樂極兮哀情多
少壯幾時兮奈老何

文選集註

卷一

○歸去來辭

序曰余家貧又心憚遠役彭澤縣去家百里故便求之及少日眷然有歸

與之情自免去職因事順心故命篇曰歸去來

陶潛

歸去來兮田園將蕪胡不歸

詩曰式微式微胡不歸

既自以心

為形役奚惆悵而獨悲悟已往之不諫知來者之可

追實迷塗其未遠覺今是而昨非舟遙遙以輕颺風

飄飄而吹衣問征夫以前路恨晨光之熹微乃瞻衡

宇載欣載奔

衡宇所居衡門屋宇也載則也

僮僕歡迎稚子候門

稚小

也候門謂於門首伺候也

三徑就荒松菊猶存

三徑蔣詡事言又不行已就荒蕪也

攜幼入室有酒盈樽引壺觴以自酌盼庭柯以怡顏

倚南窗以寄傲審容膝之易安園日涉以成趣門雖

設而常關

園中日游涉自成佳趣

策扶老以流憩時矯首而遐

觀雲無心以出岫鳥倦飛而知還景翳翳以將入撫

孤松而盤桓歸去來兮請息交以絕游世與我而相

遺復駕言兮焉求悅親戚之情話樂琴書以消憂農

人告余以春及將有事乎西疇

一井為疇有事謂耕作也

或命巾

車

巾車有幕之車也

或棹孤舟既窈窕以尋壑亦崎嶇而經

丘

窈窕紆曲貌

水欣欣以向榮泉涓涓而始流善萬物之

得時感吾生之行休已矣乎寓形宇內復幾時曷不

委心任去留胡為遑遑欲何之富貴非吾願帝鄉不

可期懷良辰以孤往或植杖而耘耔

毛詩曰或耘或耔耔謂除草

也登東臯以舒嘯臨清流而賦詩

東臯營田之所也春事起東故云東

也聊乘化以歸盡樂夫天命復奚疑

乘化謂乘其運會也歸盡謂同

歸於

盡也

序
○毛詩序

卜商

卜商字子夏衛人也孔子弟子爲衛文侯師

關雎后妃之德也風之始也所以風化天下而正夫

婦也故用之鄉人焉用之邦國焉風風

音

也教也風

以動之教以化之詩者志之所之也在心爲志發言

爲詩情動於中而形於言言之不足故嗟歎之嗟歎

之不足故永歌之永歌之不足不知手之舞之足之

蹈之也情發於聲聲成文謂之音治世之音安以樂

其政和亂世之音怨以怒其政乖亾國之音哀以思

其民困故正得失動天地感鬼神莫近於詩先王以是經夫婦成孝敬厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪

聞之者足以自戒故曰風

風化風刺皆謂譬喻不斥言也主文主與樂之宮商

相應也譎諫不直諫也

至于王道衰禮義廢政教失國異政家

殊俗而變風變雅作矣

即二迹熄而詩亡也

國史明乎得失之

跡傷人倫之廢哀形政之苛吟詠情性以風其上達於事變而懷其舊俗者也故變風發乎情止乎禮義

發乎情民之性也止乎禮義先王之澤也是以一國

之事襲一人之本謂之風

一人君也

言天下之事形四方

之風謂之雅雅者正也言王政之所由廢興也政有

小大故有小雅焉有大雅焉頌者美盛德之形容以

其成功告於神明者也是謂四始詩之至也

四始風也小雅

也大雅也頌也始者王道興衰之始也

然則關雎麟趾之化王者之風

故繫之周公南言化自北而南也

自從也從北而南謂其化從岐周被

江漢之域

鵲巢騶虞之德諸侯之風也先王之所以教故

繫之召公周南召南正始之道王化之基

鵲巢騶虞周南召南

皆篇名也正始之道
謂正王道之始也

是以關雎樂得淑女以配君子

憂在進賢不淫其色哀窈窕思賢才

哀念也

而無傷善

之心焉是關雎之義也

○尚書序

孔安國

安國以治尚書爲武帝博士遷臨淮太守

古者伏羲氏之王天下也始畫八卦造書契以代結

繩之政由是文籍生焉

書謂字畫契謂符信也

伏羲神農黃帝

之書謂之三墳言大道也少昊顓頊高辛唐虞之書

謂之五典言常道也至于夏商周之書雖設教不倫

雅誥奧義其歸一揆是故歷代寶之以爲大訓八卦

之說謂之八索求其義也

索求也言求其義也

九州之志謂之

九丘丘聚也

志記也言書記之也

言九州所有土地所生風氣

所宜皆聚此書也春秋左氏傳曰楚左史倚相能讀

三墳五典八索九丘卽謂上世帝王遺書也先君孔

子

孔子卽安國十一代祖故云先君

生於周末覩史籍之煩文懼覽

之者不一遂乃定禮樂明舊章刪詩爲三百篇約史

記而修春秋讚易道以黜八索述職方以除九丘

職方

輿地志之類也

討論墳典斷自唐虞以下訖于周

討尋也訖至也

艾

夷煩亂翦截浮辭舉其宏綱撮其機要足以垂世立

教

艾除草也夷平也言墳典之辭有煩亂雜錯者皆如艾荒草而平之有浮艷之辭皆如刀翦而截之

也
典謨訓誥誓命之文凡百篇

典謂堯典舜典也謨皋陶謨也訓伊訓也

誥康誥之類誓秦誓之類命所以恢弘至道示人主
顧命之類皆篇名總有百篇

以軌範也帝王之制坦然明白可舉而行三千之徒

竝受其義及秦始皇滅先代典籍焚書坑儒天下學

士逃難解散我先人用藏其家書于屋壁漢室龍興

開設學校旁求儒雅以闡大猷猷道也濟南伏生年過

九十失其本經口以傳授裁二十餘篇以其上古之

書謂之尚書百篇之義世莫得聞至魯共王魯共王漢景帝

子名餘謚曰共好治宮室壞孔子舊宅以廣其居於壁中得

先人所藏古文虞夏商周之書及傳論語孝經皆科

斗文字

科斗古字也

王又升孔子堂聞金石絲竹之音乃

不壞宅悉以書還孔氏科斗書廢已久時人無能知

者以所聞伏生之書考論文義定其可知者爲隸古

定更以竹簡寫之

前漢時猶未有紙故以竹簡寫之

增多伏生二十

五篇伏生又以舜典合於堯典益稷合於皋陶謨盤

庚三篇合爲一康王之誥合於顧命復出此篇并序

凡五十九篇爲四十六卷其餘錯亂摩滅不可復知

悉上送官

送官謂進於天子也

藏之書府以待能者承詔爲五

十九篇作傳於是遂研精覃思博考經籍采摭羣言

以立訓傳約文申義敷暢厥旨庶幾有補於將來書
序序所以爲作者之意昭然義見宜相附近故引之
各冠其篇首定五十八篇旣畢會國有巫蠱事經籍
道息用不復以聞傳之子孫以貽後世若好古博雅
君子與我同志亦所不隱也

文選集註

卷十

三

○春秋左氏傳序

杜預

預字元凱京兆人也起家拜尚書郎稍遷至鎮南大將軍都督荊州諸軍事平

吳加位特進

春秋者魯史記之名也

魯國史官記事而有此名非孔子名之也

記事者

以事繫日以日繫月以月繫時以時繫年所以紀遠

近別同異也

繫者以下綴上之辭猶云某年繫於某日某日繫於某月也時四時也遠近謂

年月同異謂事也

故史之所記必表年以首事年有四時故

錯舉以為所記之名也

錯舉謂四時不可偏舉故舉春以該夏舉秋以該冬也

周禮有史官掌邦國四方之事達四方之志

周禮春官之屬

有小史掌邦國之志內史讀四方之事外史掌四方之志達書名於四方此天子之史也故下言諸侯亦有諸侯亦各有國史大事書之於策小事簡牘而已

大竹曰策小竹為簡木版為牘

孟子曰楚謂之檮杌晉謂之乘而魯

謂之春秋其實一也韓宣子適魯

韓宣子晉大夫名起

見易象

與魯春秋曰周禮盡在魯矣吾乃今知周公之德與

周之所以王

易象乃周公所繫春秋遵周公之典故云

韓子所見蓋周之

舊典禮經也周德既衰官失其守

官史官也

上之人不能

使春秋昭明赴告策書諸所記注

崩薨曰赴禍福曰告記注謂紀錄也

多違舊章仲尼因魯史策書成文考其真偽而志其

典禮上以遵周公之遺制下以明將來之法其教之

所存文之所害謂以辭害義者則刊而正之以示勸戒其餘

則皆即用舊史史有文質辭有詳略不必改也故傳

曰其善志又曰非聖人孰能修之蓋周公之志仲尼

從而明之左丘明受經於仲尼以為經者不刊之書

也故傳或先經以始事傳在經前也或後經以終義傳在經後

也或依經以辯理或錯經以合異依經辯理因經而發其義也錯經合

異與經相錯綜而例即下五隨義而發其例之所重例也言左

氏一隨經義而明其例之所重舊史遺文略不盡舉非聖人所修之

要故也身爲國史

漢藝文志左丘明爲魯史

躬覽載籍必廣記而

備言之其文緩其旨遠將令學者原始要終尋其枝

葉究其所窮優而柔之使自求之饜而飫之使自趨

之若江海之浸膏澤之潤渙然冰釋怡然理順然後

爲得也其發凡以言例皆經國之常制

左傳中發凡言例如隱公

七年凡諸侯同盟於是稱盟之類有五十條皆以凡字發明類例此非左氏任意爲之皆經國之常典也

周公之垂法史書之舊章仲尼從而修之以成一經

之通體其微顯闡幽裁成義類者皆據舊例而發義

指行事以正褒貶

其者指左氏而言言傳於經之顯明者微而隱之於經之幽隱者闡

而明之裁其義理成其倫類皆據舊典凡例諸稱書

不書先書故書不言不稱書曰之類承上文發義而言有此七類

皆所以起新舊發大義謂之變例變例謂在正例之外也然亦

有史所不書即以為義者此蓋春秋新意故傳不言

凡曲而暢之也左氏於春秋新意皆隨事發傳不以凡字起例者正以委曲而通暢其意

也其經無義例因行事而言則傳直言其歸趣而已

非例也經無褒貶直紀其事故傳亦因之非例也故發傳之體有三而為

例之情有五發凡正例一也新意變例二也直言歸趣三也五例見下文一曰微

而顯文見於此而義起於彼稱族尊君命舍族尊夫

人梁公城緣陵之類是也

引三事以證微而顯之說成公十四年經曰秋叔孫

僑如如齊逆女九月僑如以夫人歸姜氏至自齊此文見於此也傳釋之曰稱族尊君命也舍族尊夫人也蓋叔孫是族氏僑如是名方其奉君命而逆女則君命為尊故稱叔孫及其與夫人俱還則夫人為尊故舍其族而但稱其名此起義在彼也僖公十九年經書梁亡十四年經書諸侯城緣陵此文見於此也傳釋之曰不書其主自取之也又曰不書其人有闕也蓋秦人滅梁而但書梁公所以見取之者無罪齊率諸侯城緣陵而但書諸侯所以見諸侯之有闕亦起義在彼也舍音捨

二曰志而晦

志記

也晦隱也謂約言以記事敘而文隱也

約言示制

約言記事以示法制所謂志也

推以

知例

推尋其事以知其例所謂晦也

參會不地與謀曰及之類是也

引此事以證志而晦之說桓公二年經曰公及戎盟于唐公至自唐傳例曰特相會往來稱地讓事也自

參以上則往稱地來稱成事也蓋唐地名也二人
其會則相讓而莫肯為王會事不成故書至自某地
也三國以上共會則一人為主會事有成故書至自
會而不書其地故曰參會不地也宣公七年經曰公
會齊侯伐萊傳例曰凡師出與謀曰及不與謀曰會
蓋彼我共謀征伐則以相連及為文而書曰及彼不
與我謀不得已而往應命則以相會合為文而書曰
會故曰與謀曰及也凡此二者皆約於一字以示法
制因此推尋可知其例所謂志
而晦者也參七南反與音預
以成曲從義訓屈曲回互從其以示大順以示其道
篇章義訓所謂婉也
謂成諸所諱辟壁假許田之類是也引諸諱避及許
章也田事以證婉而
成章之說春秋以諱國惡為禮多有諱避而不直述
其事者故言諸以總之也如桓公元年經曰鄭伯以
璧假許田傳釋之曰為周公祊故也蓋許田是魯國
朝宿之邑因創周公別廟焉祊田是鄭國湯沐之邑

二者皆天子所賜也鄭伯因地勢之便欲兩相易而代魯祀周公而祊田之薄不足當許故加璧以易之然魯不宜使鄭祀周公又不宜擅易祊田春秋諱之但書璧假許田若進璧以假田非久易也此皆委曲以示大順所謂婉而成章也辟音避

四曰盡而不汙

直盡其言無所汙曲汙音烏

直

書其事

所謂盡也

具文見意

具為其文以見譏意所謂不汙也

丹楹刻桷

天王求車齊侯獻捷之類是也

引三事以證盡而不汙之說莊公二十三年經書丹桓宮楹

二十四年經書刻桓宮桷傳曰皆非禮也桓公十五年經書天王使家父來求車傳曰諸侯不貢車服天子不私求財莊公三十一年經書齊侯來獻戎捷傳例曰諸侯不相遺殍凡此三者皆有書其事具為其文以見譏誚

五曰懲惡而勸善

惡者皆

貶之示其懲也惡者既懲善者自勸

求名而亾

為惡者欲求得名而名反亾沒

欲蓋而

章

為惡者欲掩蓋其名而名反章露

書齊豹盜三叛人名之類是也

引四事以證懲惡勸善之說昭公三十年經書盜殺衛侯之兄縶襄公二十一年經書邾庶其以漆聞丘來奔昭公五年經書莒牟夷以牟婁及防茲來奔三十一年經書邾黑肱以濫來奔蓋春秋之例非命卿不書其名齊豹衛國之卿也忿衛侯之兄而殺之欲求不畏強禦之名耳而春秋折之但書曰盜則是求名而亾也邾庶其黑肱莒牟夷三人皆非命卿不當書名其以邑來奔求食而已不明名之著於春秋也而春秋故書其名所謂欲蓋而彰也此推此五體而二者皆懲惡之事懲惡所以勸善也

廣之也前言情有五此言五體者

以尋經傳

推廣五情言其意體言其狀其實一也

以尋求仲尼作經左氏作傳之意

觸類而長之

以類觸類而增長之長于丈反

附于

二百四十二年行事

以此附于二百四十二年見人所行之事蓋春秋始隱公元年

終於獲麟凡二王道之正人倫之紀備矣或曰設為

百四十二年也問難以發春秋以錯文見義若如所論如所論謂杜氏言仲尼因

魯史舊文則經當有事同文異而無其義也等語也先儒所

傳皆不其然答曰春秋雖以一字為褒貶然皆須數

句以成言非如八卦之爻可錯綜為六十四也固當

依傳以為斷古今言左氏春秋者多矣今其遺文可

見者十數家大體轉相祖述進不成為錯綜經文以

盡其變退不守丘明之傳於丘明之傳有所不通皆

沒而不說而更膚引公羊穀梁適足自亂膚淺也諸家更淺

引公穀以訓解春秋是預今所以爲異專修丘明之適足以自亂終無益也

傳以釋經經之條貫必出於傳傳之義例總歸諸凡推變例以正褒貶簡二傳而去異端蓋丘明之志也其有疑錯則備論而闕之以俟後賢然劉子駿創通

大義賈景伯父子許惠卿皆先儒之美者也

子駿劉歆也景

伯賈逵也父徽字元伯受業於劉歆作春秋條例逵作左傳訓詁惠卿許淑也亦治左氏春秋未有

穎子嚴者

子嚴名容

雖淺近亦復名家故特舉劉賈許穎

之違以見同異分經之年與傳之年相附比其義類各隨而解之名曰經傳集解又別集諸例及地名譜

第歷數相與爲部

諸例謂不在凡例之內者地名謂輿地沿革之名譜第謂世族圖譜

歷數謂甲子以類各爲一部

凡四十部十五卷皆顯其異同從而

釋之名曰釋例將令學者觀其所聚異同之說釋例
詳之也或曰春秋之作左傳及穀梁無明文說者以
爲仲尼自衛反魯修春秋立素王丘明爲素臣言公
羊者亦云黜周而王魯危行言遜以避當時之害故
微其文隱其義公羊經止獲麟而左氏經終孔丘卒
敢問所安答曰異乎余所聞仲尼曰文王旣沒文不
在茲乎此制作之本意也歎曰鳳鳥不至河不出圖

吾已矣夫。蓋傷時王之政也。麟鳳五靈王者之嘉瑞也。今麟出非其時。虛其應而失其歸。此聖人所以爲感也。絕筆於獲麟之一句者。所感而起。固所以爲終也。曰然則春秋何始於魯。隱公答曰。周平王東周之

始王也。隱公讓國之賢君也。

周自平王東遷故云東周始王隱公名息姑惠

公長子攝王國事以遜其弟故曰讓國賢君

考乎其時則相接言乎其位

則列國本乎其始則周公之祚胤也。若平王能祈天永命。紹開中興。隱公能弘宣祖業。光啟王室。則西周之美可尋。文武之迹不墜。是故因其歷數附其行事。

采周之舊以會成王義

王義謂一王之大法也

垂法將來所書

之王卽平王也所用之歷卽周正也所稱之公卽魯
隱也安在其黜周而王魯乎子曰如有用我者吾其
爲東周乎此其義也若夫制作之文所以章往考來
情見乎辭言高則旨遠辭約則義微此理之常非隱
之也聖人包周身之防旣作之後方復隱諱以避患
非所聞也子路欲使門人爲臣孔子以爲欺天而云
仲尼素王丘明素臣又非通論也先儒以爲制作三
年文成致麟旣已妖妄又引經以至仲尼卒亦又近

誣據公羊經止獲麟而左氏小邾射亦不在三叛之

數哀公十四年書小邾射以勾繹來奔事在獲麟之後若獲麟後亦孔子所修則小邾射當與庶其黑

肱牟夷同列而為四叛矣今止稱三叛而射不在其數則知經止於孔丘卒者誣也故余以為

感麟而作作起獲麟則文止於所起為得其實至於

反袂拭面稱吾道窮此引公羊語而駁之也亦無取焉

卷之六

七

七

○三都賦序

左思作三都賦世人未重皇甫謐有高名於世思乃造而示之謐稱善為

其序

皇甫謐

謐字士安年二十始受書得風痺疾猶手不輟卷舉孝廉不行又辟著作不應

玄晏先生曰

謐自號玄晏先生

古人稱不歌而頌謂之賦然

則賦也者所以因物造端敷弘體理欲人不能加也

引而伸之故文必極美觸類而長之故辭必盡麗然

則美麗之文賦之作也昔之為文者非苟尚辭而已

將以紐之王教本乎勸戒也

紐系也

自夏殷以前其文

隱沒靡得而詳焉周監二代文質之體百世可知故

孔子采萬國之風正雅頌之名集而謂之詩詩人之

作雜有賦體子夏序詩曰一曰風二曰賦故知賦者

古詩之流也至于戰國王道陵遲風雅寢頓頓壞也於

是賢人失志詞賦作焉是以孫卿屈原之屬遺文炳

然辭義可觀存其所感咸有古詩之意皆因文以寄

其心託理以全其制賦之首也及宋玉之徒淫文放

發言過于實誇競之興體失之漸風雅之則於是乎

乖逮漢賈誼頗節之以禮自時厥後綴文之士不率

典言竝務恢張其文博誕空類恢誕皆大也空類謂言不附實但爲空大

大者罩天地之表細者入毫纖之內雖克車聯駟不
足以載廣廈接榱不容以居也其中高者至如相如
上林楊雄甘泉班固兩都張衡二京馬融廣成王生
靈光初極宏侈之辭終以約簡之制煥乎有文蔚爾
鱗集皆近代辭賦之偉也若夫土有常產俗有舊風
方以類聚物以羣分而長卿之儔過以非方之物寄
以中域非方之物謂所述非其地所出也長卿上林
言盧橘夏熟楊雄甘泉言玉樹青蔥之類
虛張異類託有於無祖構之士雷同影附流宕忘反
非一時也祖者宗習之謂也構作也
宕過也非一時言久也曩者漢室內潰

四海圯裂孫劉二氏割有交益魏武撥亂擁據函夏
故作者先爲吳蜀二客盛稱其本土險阻壤琦可以
偏王而却爲魏主述其都畿弘敞豐麗奄有諸華之

意

作者謂左思也
壤美也琦大也

言吳蜀以擒滅比亾國而魏以交

禪比唐虞旣已著逆順且以爲鑒戒蓋蜀包梁岷之

資吳割荆南之富魏跨中區之衍

梁岷二山名荆南
荆州以南也中區

中國也
衍大也

考分次之多少計殖物之衆寡

星之分次物
之生殖也

比風俗之清濁課士人之優劣亦不可同年而語矣

二國之士各沐浴所聞

二國吳
蜀也

家自以爲我土樂人

自以爲我民良皆非通方之論也作者又因客主之
辭正之以魏都折之以王道其物土所出可得披圖
而按體國經制可得按記而驗豈誣也哉

而封歸國孫歸何縣楚時而鯁豈歸也姑

猶五之以懸諸沛之以王其地土而山何縣楚國

自以爲非其昔非鯁氏之歸也非其昔又因客主之

○思歸引序

思歸引古曲名崇爲太僕卿有思歸之意故有此作今選中但採其序而

不錄

其引

石崇

余少有大志夸邁流俗弱冠登朝歷位二十五年五

十以事去官

崇爲大司農坐未被書擅去官免

晚節更樂放逸篤好

林藪遂肥遯於河陽別業

肥遯易遯卦上爻辭漢作飛遯別業別居也

其

制宅也却阻長隄前臨清渠栢木幾於萬株流水周

於舍下有觀閣池沼多養鳥魚家素習技頗有秦趙

之聲出則以游目弋釣爲事入則有琴書之娛又好

服食咽氣志在不可傲然有凌雲之操歛復見牽羈

婆娑於九列

謂仕宦如以物牽引而羈繫也婆娑游處也九列九卿也時崇爲太僕卿

困

於人間煩黷常思歸而永歎

黷媒也

尋覽樂篇有思歸

引

琴操思歸者衛女之所作也欲歸不得心悲傷援琴而歌作思歸引

儻古人之情有

同於今故制此曲此曲有絃無歌今爲作歌辭以述

余懷恨時無知音者令造新聲而播於絲竹也

○豪士賦序

豪士謂智勇人也機惡見齊王問自矜其功有篡位心因賦以諷之選中

但錄其序不載其賦

陸機

夫立德之基有常而建功之路不一何則循心以爲

量者存乎我因物以成務者繫乎彼存夫我者隆殺

止乎其域繫乎物者豐約唯所遭遇

域猶云力量也

落葉俟

微風以隕而風之力蓋寡孟嘗遭雍門而泣而琴之

感以未

桓子新論雍門周以琴見孟嘗君君曰先生鼓琴亦能令文悲乎對曰臣竊爲足下有所

悲千秋萬歲後墳墓生荆棘遊童牧豎躑躅其足而歌其上曰孟嘗君之尊貴亦猶若是乎於是孟嘗喟

然太息涕承曉而未下雍門周引琴而鼓之徐動何
宮徵揮角羽初終而成曲孟嘗君遂歔歔而就之何
者欲隕之葉無所假烈風將墜之泣不足繁哀響也

葉欲隕而不假烈風故云風之力寡是故苟時啟於
泣將墜而不繁哀響故云琴之感末

天理盡於民庸夫可以濟聖賢之功斗筭可以定烈
士之業言遇時也故曰才不半古而功已倍之蓋得

之於時勢也歷觀古今微一時之功而居伊周之位

者有矣夫我之自我智士猶嬰其累物之相物昆蟲

皆有此情

我之自我卽爾爲爾我爲我也相物猶相
形也昆明也明蟲者陽而生陰而藏言至

微也夫以自我之量而挾非常之勲神器暉其顧盼萬

物隨其俯仰

神器天下也

心玩居常之安耳飽從諛之說

豈識乎功在身外任出才表哉

任出才表言位重才輕

且好榮

惡辱有生之所大期

期皆期於是也

忌盈害上鬼神猶且不

免

周易曰鬼神害盈而福謙不免猶云亦然也

人主操其常柄天下服其

大節故曰天可讐乎而時有衺服荷戟立乎廟門之

下援旗誓衆奮於阡陌之上

漢書宣帝祠孝昭廟是時霍氏外孫任宣坐謀

反誅宣子章爲公車丞亾在渭城界中夜衺服入廟

居郎間執戟立廟門待上至欲爲逆發覺伏誅衺服

黑服也楚將項燕爲秦所殺項梁與諸侯引

旗誓衆約將滅秦以報父讐阡陌道路也

况乎代

主制命自下裁物者哉

言人主威柄素爲人所服者尚不免有意外之變而况人

臣假天子之權者能保人之不謀我乎

廣樹恩不足以敵怨勤興利不

足以補害故曰代大匠斲者必傷其手

老子曰夫代大匠斲希有

不傷其手

且夫政由寧氏忠臣所為慷慨祭則寡人人主

所不久堪

衛獻公時政由大夫寧氏不由公族但祭祀則公主之而已此忠臣見之發憤人主

不能久堪也

是以君奭鞅鞅不悅公旦之舉高平師師側

目博陸之勢而成王不遣嫌吝於懷宣帝若負芒刺

於背非其然者與

君奭召公也鞅鞅不悅貌公旦周公也召公為保周公為師相成王

召公不悅疑周公有異志魏相封高平侯班固述曰高平師師惟辟作威圖黜凶害天子是毗博陸侯霍光也初管叔流言於國曰公將不利於孺子成王信而疑周公宣帝見高廟霍光參乘上內嚴憚之若有

芒刺在背言周公霍光所以致君
疑懼者豈不為臣勢彊而然歟嗟乎光于四表德

莫富焉王曰叔父親莫昵焉登帝天位功莫厚焉守

節沒齒忠莫至焉而傾側顛沛僅而自全
周公霍光皆危而得

自全傾側顛沛言危也則伊生抱明允以嬰戮文子懷忠敬而

齒劒固其所也
伊生伊尹也文子越大夫文種也皆誅死因斯以言夫以

篤聖穆親如彼之懿
謂周公也篤厚也穆和也懿美也大德至忠如

此之盛
謂霍光也尚不能取信於人主之懷止謫於衆多

之口過此以往惡覩其可安危之理斷可識矣又况

乎饗大名以冒道家之忌運短才而易
去聲聖哲所難

平者哉饕貪也道家所忌如莊子功成者墮名成者虧之類身危由於勢過而

不知去勢以求安禍積起於寵盛而不知辭寵以招

福見百姓之謀已則申宮警守以崇不畜之威申宮警備

見左傳猶云戒嚴也懼萬民之不服則嚴刑峻制以賈古傷心

之怨賈賈也然後威窮乎震主而怨行乎上下衆心日

侈直氏危機將發而方偃仰瞪眊謂足以夸世偃仰驕傲貌瞪

直視也夸世謂夸其功能於世也笑古人之未工忘已事之已拙知

曩勲之可矜暗成敗之有會徒知前日之功可以自矜不知成敗之理自有

運會也是以事窮運盡必於顛仆風起塵合而禍至常

酷也聖人忌功名之過已惡寵祿之踰量蓋爲此也
夫惡欲之大端賢愚所共有而游子徇高位於生前
志士思垂名於身後受生之分唯此而已

禮記曰飲食男女人

之大欲存焉。人貧苦人之大惡存焉。故惡欲者心之大端也。游子謂游宦之子也。

夫蓋世之

業名莫大焉震主之勢位莫盛焉率意無違欲莫順
焉借使伊人頗覽天道知盡不可益盈難久持超然
自引高揖而退則巍巍之盛仰邈前賢洋洋之風俯
冠來籍而大欲不乏於身至樂無愆乎舊節彌效而
德彌廣身愈逸而名愈劭

借猶假也冠來籍謂將來書中首稱也劭美也愈益

也

此之不為彼之必昧

此謂引退也彼謂貪位也

然後河海之跡

堙為窮流一簣之釁積成山岳

河海堙為窮流喻目前之勢雖大亦有時

而困阨也一簣積成山岳喻嫌隙雖微而漸積以至於大也

名編凶頑之條身厭

荼毒之痛豈不謬哉

荼毒之痛謂受刑也

故聊賦焉庶使百世

少有寤云

○三月三日曲水詩序

文帝元嘉十一年三月丙申禊飲於樂遊苑上祖道

江夏王義恭衡陽王義季有詔會者咸作詩顏延之作序

顏延之

夫方策既載皇王之迹已殊鐘石畢陳舞詠之情不一雖淵流遂往詳略異聞然其宅天衷立民極莫不崇尚其道神明其位拓世貽統固萬葉而為量者也

拓廣也

有宋函夏帝圖弘遠

函夏中國也言有宋奄居中國也

高祖

以聖武定鼎規同造物皇上以獻文承歷景屬宸居

宸居帝位也言文帝以聖文之德承歷數繼先帝之位

隆周之卜既永宗漢之

兆在焉

周室既興卜年七百漢文紀曰王卜得大橫占曰大橫庚庚余為天王遂即位為文帝宋

為漢後故云宗漢言

宋祚將與周漢同也

正體毓德於少陽王宰宣哲於

元輔

正體謂太子東宮曰少陽王宰太宰也哲智也

畧緯昭應山瀆效靈

畧

影也緯五星也山五嶽也瀆四瀆也效靈山出器車瀆出圖書之類

五方雜遯四隩來

暨

五方四方中國也雜遯人物殷眾也四隩四方蠻夷也暨至也

選賢建戚則擇之

於茂典施命發號必酌之於故實

言選賢才以居職立親戚以為公侯

則擇其美行可法則者施命謂行令也酌取也故實先王之道也

大子協樂上庠肆

教

大子樂名協和也上庠儒學也肆行也

章程明密品式周備

品品秩也式猶

法也

國容眡令而動軍政象物而具

司馬法曰國容不入軍軍容不入國

國容百官之儀也。眡令謂觀號令。箴闕記言校文講也。象物謂象熊羆虎豹之威猛也。

藝之官采遺於內。輶車朱軒懷荒振遠之使論德于

外。箴戒也。闕闕失也。記言謂言則左史記之也。校文

之事。輶車朱軒使者之車也。懷荒謂使者能懷來荒服也。振遠振起遠人使歸化也。論德論天子之德也。

頽莖素毳呂銳并柯共穗之瑞。史不絕書。棧山航海踰

沙軼漠之貢。府無虛月。頽莖朱草也。素毳白虎也。并柯連理木也。共穗嘉禾也。皆

太平之瑞也。史書不絕言常有之。遠方之國山作棧道。海濟舟航踰度沙漠來貢土物。府庫之內每月不

絕。烈燧千城通驛萬里。燧烽火也。穹居之君內首稟朔并

服之首迴面受吏。穹居之君匈奴也。卉服之酋南蠻也。內首迴面皆賓服爲臣也。稟朔

稟正朔也受吏謂
受郡縣之制也
是以異人慕響俊民間出警蹕清

夷表裏悅穆
天子出入曰警蹕夷平
將徙縣中宇張

樂岱郊
宋居江東故將欲移都於中國也縣都也中
宇中國也張用也岱山也郊南郊也將欲用

樂祭岱山
增類帝之宮飾禮神之館塗歌邑誦以望
拜南郊也

屬車之塵者久矣
禮記天子將出征類于上帝類祭
也天子行有屬車三十六乘望屬

車者望天子來
日躔胃維月軌青陸
此始謂三月之
也塵者車塵也
時也躔次也胃

星名維畔也月令云季春之月日在胃
青陸東道也言立春春分月從東道也
皇祇發生之

始后王布和之辰
皇祇天地也言春時是天地發生
萬物之時君王布政惠和之日也

后君
思對上靈之心以惠庶氓之願加以二王于邁
也

出餞戒告

言天子思答上天之心以惠衆人之望加以江夏衡陽二王之行乃與羣臣出餞戒

告

有詔掌故爰命司歷

掌故掌知故事者司歷知時歷之官也

獻洛飲

之禮具上巳之儀

周公禘飲于洛

南除輦道北清禁林

除掃除也

輦道天子行之道也禁林苑也

左關巖陞

都鄧

右梁潮源略亭皋跨芝

廛苑太液懷曾山

關據也陞阪也梁橋也言潮水之上作橋亭皋謂野作亭也芝廛芝

田也洛陽地名言亦將跨越之也漢武帝太液池中有高山言我今以彼池爲苑包懷其高山也

松

石峻峴

古毀

蔥翠陰烟游泳之所攢萃翔驟之所往還

於是離宮設衛別殿周微

陰烟山中氣也游泳魚龍也攢萃集聚也翔驟鳥獸

也離宮天子出游之宮設衛宿衛也微巡也

旌門洞立延帷接桓

旌門以旗爲門

洞通也延幄謂列帷使相
接而迴柱也柱行馬也

閱水環階引池分席

分席謂水

分流各至坐所也

春官聯事蒼靈奉塗然後升秘駕胤緹騎

搖玉鑾發流吹

春官掌禮之官聯事謂供職也蒼靈謂春初句芒也奉塗謂前驅以清道

也秘駕天子馬也胤引也緹騎金吾騎兵也玉鑾天子發駕也流吹笳簫之類

天動神移淵

旋雲被以降于行所禮也

行所即行在所也

既而帝暉臨幄

百司定列鳳蓋俄軫紅旗委旆

帝暉天子之光也臨幄坐於帳也軫停也

委安也

肴𩚑

速

芬藉觴醕

亦

泛浮

魚肉曰肴菜蔬曰𩚑芬香也藉重也觴醕

酒也泛浮言多也

妍歌妙舞之容銜組樹羽之器

銜組樹羽鐘磬格兩

頭刻為龍頭以銜絲組又樹以羽毛為幢

三奏四上之調六莖九成之曲

競氣繁聲合變爭節

韓子曰師曠奏清徵一奏有玄鶴二八來集再奏而列三奏延

頸而鳴摠翼而舞四上謂代奏鄭衛也六葦顓頊樂九成韶樂也

龍文飾轡青翰侍

御

龍文馬名見西域傳青翰舟名見說苑

華裔殷至觀聽驚集揚袂風

山舉袖陰澤靚裝藻野袷服縟川

華裔內外也殷盛也驚奔也言侍從

之衆揚其衣袂則如風吹山舉其袖則蔽川澤而成陰靚裝美人脂粉之色袷服美麗之衣也言美人裝服映其川野成其文藻也縟雜色也故以殷隱賑軫外區煥衍都內者

矣

殷賑富有貌煥衍多溢貌

上應萬壽下禔

氏

百福而筵稟和闔

堂依德

筵席也稟受也闔滿也言羣臣皆受天子和平之樂依天子仁惠之德也

情盤景

遽歡洽日斜

盤樂也景日影也遽疾也洽合也

金駕總駟聖儀載佇

金駕天子車也總駟謂聚其駟馬將駕而行也
聖儀天子儀也載佇謂盤桓未去尚惜此宴也
悵鈞

臺之未臨慨鄴宮之不縣
鈞臺夏啟會饗諸侯之所也
鄴宮周康王朝諸侯之

宮也不縣謂不作
樂也縣與懸同
方且排鳳闕以高游開爵園而廣

宴
鳳闕闕名爵園鄴都園名
言志欲平中原也
竝命在位展詩發志則夫

誦美有章陳信無愧者歟
楚子木問趙孟云范武子德何如對曰其祝史陳信

於鬼神無愧辭也言天子
仁明可當頌德而無愧也

○三月三日曲水詩序

武帝永明九年三月三日幸芳林園禊飲勅融為序

王融

臣聞出豫為象釣天之樂張焉

易豫卦象曰先王以作樂崇德釣天乃天

帝樂時乘既位御氣之駕翔焉

易乾卦云時乘六龍以御天也既位謂飛龍喻

天子得位也

是以得一奉宸逍遙襄城之域

老子曰王侯得

氣元氣也

一而天下正襄城體元則大悵望姑射之阿然宵眇

寂寥其獨適者也

元善也體善則大謂堯也堯出游見四子於姑射之山宵然喪其天

下至如夏后兩龍載驅璿臺之上穆滿八駿如舞瑤

水之陰亦有饗云固不與萬民共也

夏后帝啟也有馬號兩龍乘游

於瑤臺之上以饗諸侯周穆王名滿故云穆滿言乘
八駿以游行天下如舞馬行貌瑤水瑤池也穆王游
於崑崙山見西王母宴于瑤池之上
言此二主有宴饗又不與天下共樂
我大齊之握機

創歷誕合建家接禮貳宮考庸太室

握機執天下之柄也創歷改正

朔也誕大也貳宮即貳室也庸用也太室明堂也言考用才能於明堂也

幽明獻期雷風

通饗昭華之珍既徙延喜之玉攸歸

幽明獻期祥瑞見也雷風通饗

陰陽和也堯得舜贈以昭華之玉天錫禹玄珪刻曰延喜之玉言此二寶皆在齊也

革宋受天

保生萬國度

待洛

邑靜鹿丘之歎遷鼎息太垆

古螢

之慙

周書丘或為苑武王克殷將度邑自鹿丘而歎成湯即天子位還遷九鼎於亳都至大垆而有慙德歎與慙皆謂以臣伐君也鹿丘大垆並地名言齊受宋禪而非征伐也
紹清和於帝猷聯

顯懿於王表

言能繼清和之德於五帝之表

駿發開其

遠祥定爾固其洪業

毛詩濬哲維商長發其祥又駿發爾私又天保定爾亦孔之固

謂高明之德啟發其禎祥安定之道堅固其基業也

皇帝

齊武帝也

體膺上聖運鍾

下武

下武謂文王之下武王繼之言武帝能繼先業亦如武王繼文王之道也

冠五行之

秀氣邁三代之英風昭章雲漢暉麗日月牢籠天地

彈壓山川

淮南子語

設神理以景俗敷文化以柔遠

神聖猶神

道也景炤也尚書曰柔遠能邇柔安也

澤普汜而無私法含弘而不殺

猶且具明廢寢晏晷忘餐

尚書文王自朝至手日晏弗皇暇食

念負重

於春冰懷御奔於秋駕

鄧析子曰明君之御民若乘奔而無轡履冰而負重也莊

子曰尹儒學御三年而無所得夜夢受秋駕明日往朝師師曰今將教子以秋駕

可謂巍巍

弗與蕩蕩誰名秉靈圖而非泰涉孟門其何險

靈圖天子

位也言不以天子之位為泰孟門山名

儲后睿哲在躬妙善居質

儲后太子

也內積和順外發英華斧藻至德琢磨令範

斧藻謂修飾也

言炳丹青道潤金壁出龍樓而問豎入虎闥而齒胄

漢書上嘗召太子出龍樓門周禮曰師氏以三德教國子居虎門之左問豎謂文王為太子至寢門外朝於王季問於內豎虎闥教國子之所也公卿之子為胄子言太子入學以年大小為次不以天子之子為上故云齒
愛敬盡於一人光耀究於四海若夫族茂

麟趾宗固磐石踰躔

女展

昌姬韜軼炎漢

麟趾詩篇名

美公族之盛

也磐石大石也言宗族堅固加大石不可轉易也元
跨越也昌姬謂文王也軼遲也漢火德故稱炎

宰比肩於尚父中鉉繼踵乎周南分陝流勿翦之歡

來仕允克施之譽

元宰謂宰相也言宰相之德與太公比肩也鉉鼎耳脣三公位也易

曰鼎黃耳中以爲實也故云中鉉踵跡也周南周公也周公邵公分陝界而治詩云蔽芾甘棠勿翦勿伐邵伯所茇故云勿翦允信也克能也言來仕宦信能當施惠之譽也莫不如珪如璋令

問令望朱芾斯皇室家君王者也

珪璋喻賢才也朱芾官之服飾也皇

大也室猶親密也言爲臣皆親密於君也皆詩辭

本枝之盛如此稽古之政

如彼

本枝謂宗族

用能免羣生於湯火納百姓於休和草

萊樂業守屏稱事

湯火謂禍亂也休和謂休息和平也草萊謂山野樵採之人也守屏

謂州牧也

引鏡皆明目臨池無洗耳

譙周考史曰公孫述竊位於蜀蜀人任永

託目盲不仕及述誅澡盥引鏡自照日時清目明高士傳曰堯致天下讓許由巢父聞之乃臨水洗耳

沈冥之怨既缺適

和

軸之疾已消

嚴君平常病不事沈冥而死毛詩考

槃在陸碩人之軸考槃在阿碩人之適軸病也謂賢人隱居而離困病缺與消謂疾病盡除也興廉

舉孝歲時於外府署行議年日夕于中甸

言舉孝廉賢才每歲

貢自州郡也外府州郡也署考也考吏行之殿最議年穀之豐儉而奏於天子使朝夕盈于畿甸之中也

協律總章之司序倫正俗

協律樂官總章禮官也倫次也言各有次序以正風

俗

崇文成均之職導德齊禮

崇文成均司教之職

挈壺宣夜辯

氣朔於靈臺書笏珥形紀言事於仙室

挈壺氏掌刻漏之官知晝

夜日月氣候之事朔月初也靈臺觀懸象之所也執
笏者所以書記事也珥執也彤赤管筆也皆史臣所
以書記也後漢書學者稱東觀為
老氏藏室道家蓬萊故言仙室
褰帷斷裳危冠空

履之吏

後漢賈琮為冀州刺史車垂赤帷而行及至
州自言曰刺史當遠視廣聽何反垂帷於車

以自掩蔽乃命御者褰去其帷朱博為琅邪太守俗
多舒緩衣長不中節度皆斷其衣裳令去地三寸以
便於事危冠空履
言廉也空當作穿
影搖武猛扛鼎揭旗之士
霍去病
為影姚

校尉搖當作姚丁白為武
勤恤民隱糾逖王慝
糾逖
正也

也
射集隼於高墉繳之
大風於長隧不仁者遠惟

道斯行

隼鷙鳥以喻凶人也墉墻也言射此鳥於高
墉之上喻除凶人也堯時風伯為害堯使羿

繳之于青丘之
讒莠蔑聞攘爭掩息
讒諧之人在朝
如苗之有莠攘

爭謂攘臂而爭訟也言齊朝無此事也茂無也稀鳴桴於砥路鞠茂草於圓

扉桴擊鼓木也鼓所以鳴于路者蓋為盜發而擊之也今稀鳴謂少盜賊也砥平也鞠養也圓扉獄也

言時無犯罪者獄皆久空故養盛草也耆年闕市井之游稚齒豐車馬

之好言老少皆得所也車馬謂鳩車竹馬也宮隣昭泰荒憬清夷宮隣言近

也荒憬言遠也夷平也言遠近咸和平也侮食來王左言人侍離身反踵

之君髻側首貫胸之長屈膝厥角請受纓縻侮食左言離身

反踵髻首貫胸皆遠夷也屈膝拜也厥角叩頭也纓縻猶言羈縻也文鉞碧斨之琛奇

幹善芳之賦善芳者頭若雄雞佩之令純牛露犬之

玩乘黃茲白之純牛小牛也露犬能飛食虎豹乘黃者似狐其背有兩角茲白者若

馬皆遠方奇獸也

盈衍儲邸克初郊虞

盈衍克初皆滿也儲邸猶府藏也郊四郊

也虞掌山澤之官也

匭牘相尋鞮譯無曠

匭音軌匭牘以乘章奏也相尋言貢獻不

絕也周官鞮鞻氏掌四夷之樂譯傳四夷之語而宣之者也

一尉候於西東合車

書於南北暢轂埋麟麟之轍綏旌卷悠悠之旆

楊雄解嘲

曰東南一尉西北一候暢長也長轂兵車也麟麟衆車聲也綏車上垂繩也旌旗也悠悠旌旆垂貌埋卷

言皆不用四方無拂五戎不距偃革辭軒銷金罷刃

四方之戎

有五種無拂不距言歸伏也拂亂也偃息也革甲也辭軒去兵車也金刃兵器也皆銷毀罷去示不用也

天瑞降地符升澤馬來

孝經援神契曰德至山陵則澤出神馬

器車出

禮記山出器車

紫脫華朱英秀

禮斗威儀曰人君政平遠方神獻其朱英紫脫紫脫朱英

並瑞草也華

秀皆花也

佞枝植

黃帝有屈軼出於階若佞人入朝則指之故曰佞枝植生也

曆草孳

堯時有蓂莢草生於階有十五葉從月一日生一葉至十五日日落一葉若月小則餘一

葉見此以知日曆故云曆草孳茂也

雲潤星暉風揚月至

京房易飛候曰青雲潤澤

蔽日在西北為舉賢良禮斗威儀曰君乘土其政平則鎮星黃而多暉月至月行以度至也

江海

呈象龜龍載文方握河沈璧封山紀石邁三五而不

追踐八九之遙迹

八九謂七十二君

功既成矣世既貞矣信

可以優游暇豫作樂崇德者歟于時青鳥司開條風

發歲粵上斯已惟暮之春

青鳥春鳥也司開謂主生萬物也條風春風也粵上

斯已謂於此上已也

同律克和樹草自樂

周禮太師掌六律六同以合陰陽之聲同

陰律也

禊飲之日在茲風舞之情咸蕩去肅表乎時訓

行慶動於天矚

禊者潔也風舞即風平舞雩也蔡邕月令章句曰秋冬肅急之後故布生

德和政令去肅急禮記孟春之月命相布德和令行慶施惠慶賞也矚視也

載懷平圃乃

睠芳林芳林園者福地奧區之湊丹陵若水之舊

平圃

在槐山之陽芳林園在齊高帝舊宅丹陵地名堯所生處若水水名帝顓頊所生處皆非江東之地借以

美之

殷殷

上聲

均乎姚澤

無

尚於周原

殷殷盛也姚澤舜生

處無無美也均同也尚加也

狹豐邑之未宏陋譙居之猶褊

豐邑漢高

故里也無若魏武帝故里也

求中和而經處揆景緯以裁基飛觀

神行虛檐雲構

言於園中作宮也經處猶經營也周禮以土圭之法正日影日至影尺有

五寸謂之地中陰陽之所和故曰中和揆度也景日也緯星也言度日星以正東西南北之位也神行言高若鬼神所作也行猶作離房乍設層樓間去聲起負也雲構言高與雲齊也

朝陽而抗殿跨靈沼而浮榮榮屋翼也鏡文虹於綺疏浸

蘭泉於玉砌鏡照也文虹謂屋上畫虹蜺之文也綺疏窓也渠中生蘭水繞於階故云浸蘭

泉於玉砌幽幽叢薄秩秩斯干曲拂迢迢潺湲徑復草木叢生

曰薄秩秩有序貌干水涯也曲拂迢迢謂水曲折流也潺湲石中水流貌徑復謂出入山谷也新萍

泛沚華桐發岫雜天采于柔荑亂嚶聲於綿羽月令季春

之月桐始華萍始生小洲曰沚山有穴曰岫天采桃花也柔荑初生木葉也詩曰綿蠻黃鳥故曰綿羽

禁軒承幸清宮俟宴乘輿之物皆呼曰禁清宮汎掃也緹帷宿置帟

幕宵懸

緹丹黃色也天子帳帷用之帝平帳也幕帳裙也宿置宵懸謂預設以俟也

既而

滅宿澄霞登光辨色

宿列宿也滅宿澄霞謂天曉而無雲也登光辨色謂日光初升

始辨色也

戒道執爰展軫效駕

戒道辟人清路也毛詩伯也執爰爰兵器也禮記曰

君車已駕則僕展軫效駕效命也

徐鑾警節明鐘暢音

鑾鈴也警節使馬行有節

而疾徐比於一也明鐘曉鐘也暢通也

七萃連鑣九旂齊軌

七萃壯勇士也鑣馬

銜也天子之車九乘名曰九旂軌車跡也

建旗拂蜺揚葭振木

建立也拂蜺謂旗高

也葭簫管屬言其聲振動山木

魚甲烟聚貝胄星羅重英曲瑤

側之

飾絕景追風之騎

魚甲以鮫皮為甲也貝胄以貝珠為胄也胄兜鍪也烟聚星羅言多

也重英綵畫之矛也曲瑤車蓋玉也絕景追風之騎良馬也

昭灼甄部駟駿函列

虎視龍超雷駭電逝

孫子兵法長陣為甄昭灼照耀也駟駿良馬也函列行也虎視

龍超雷駭電逝者並言奔走之疾也

轟轟隱隱紛紛軫軫羌難得而稱

計

轟轟羣車聲也紛紛軫軫多也羌歎辭也計數也

爾乃迴輿駐罕岳鎮淵

渟

罕獵車名孫武子兵法其鎮如岳其渟如淵

睟容有穆賓儀式序授几

肆筵因流波而成次蕙肴芳醴任激水而推移

毛詩或肆

之筵或授之几

葆佾陳階金匏在席戚奏翹舞籥動邠詩

葆所

以障舞人也佾舞名金匏二音也戚斧也翹舞名籥樂器也邠詩所以迎暑節謂將至夏也

召鳴

鳥于弇州追伶倫於嶰谷發參差於王子傳妙靡於

帝江

弇州之山五彩之鳥名曰鳴鳥弇音奄黃帝使伶倫取竹嶰谷斷兩節間而吹之以為黃鐘之

宮嶰脫也谷竹溝也取竹之脫無溝節者而用之也
參差笙也王子王子喬也妙靡猶妙麗也天山有神
鳥識歌舞
名曰帝江
正歌有闕羽觴無筭上陳景福之賜下獻

南山之壽

儀禮曰工告于樂正曰正歌備闕闕終也
毛詩君子萬年介爾景福又曰如南山之

壽不騫
不崩

信凱讌之在藻知和樂於食苹桑榆之陰不

居草露之滋方渥

凱歡也詩云魚在藻凱樂飲酒喻
羣臣依明君如魚在於水藻之中

以樂也食苹鹿鳴之詩也宴嘉賓之義日在桑榆之
間言日景不畱也草露之滋方渥喻君恩已霑也滋
潤也渥
厚也
有詔曰今日嘉會咸可賦詩凡四十有五人

其辭云爾

文選集註

卷十

四

○王文憲集序

文憲者齊尚書令王儉也

任昉

公諱儉字仲寶琅邪臨沂人也其先自秦至宋國史

家諱詳焉晉中興以來六世名德爲海內冠冕

王祥弟覽

生導導生洽洽生珣珣生曇首曇生僧綽綽生綽遇害子儉嗣故云六世冠冕言望族也

古語云

仁人之利天道運行

天道運行言仁人之報世祥長遠如天運之不絕也

故呂

虔歸其佩刀郭璞誓以淮水

魏徐州刺史呂虔有刀工相之爲三公可服之

刀虔謂別駕王祥曰苟非其人刀或爲害卿有公輔之量故以此相與及祥歿之日以刀授弟覽曰吾兒凡汝後必興之足稱此刀故以相與王氏家譜曰初王導渡淮使郭璞筮之卦成璞曰吉無不利淮水絕

王氏

若離翦之止殺吉駿之誠感蓋有助焉

離王離也翦王

翦也竝為秦將行殺伐故云止殺書云以殺止殺終無犯者漢朝王吉吉子駿皆為諫議大夫俱著誠信

公之生也誕授命世體三才之茂踐得一之幾

老子侯王

得一以為天下貞

信乃昴宿垂芒德精降祉有一于此蔚為

帝師

昴星也垂芒謂發秀也精星也

况乃淵角殊祥山庭異表望衢

罕窺其術觀海莫除其瀾

論語撰考識顏回有角額似月形淵水也月是水精

故名淵摘輔像曰子貢山庭斗繞謂面有三庭山在中鼻高有異相也

宏覽載籍博游

才義若乃金版玉匱之書海上名山之旨

金版玉匱太公書名

也荀爽隱海上著書百篇名山即司馬遷所述史記所謂藏之名山者也

沈鬱澹雅之思

此書離

三才總制清衷遜

非虛明之絕境不可窮者

也然檢鏡所歸人倫以表雲屋天

函洛不守憲章中輟

函函關謂長安也洛洛陽也言

自西晉喪亂不守二京憲章經籍皆中道而壞

賀生達禮之宗蔡公儒林之

亞闕典未補大備茲日

晉賀循明三禮為江東儒宗又有蔡謨亦儒林之次也言

賀蔡尚有闕典未補者而公乃能備修於此日

至若齒危髮秀之老含經味

道之生

齒危謂老者齒將落也髮秀謂髮白也生者有德之稱

莫不北面人宗

自同資敬

北面執弟子禮也人宗謂為人所尊也自同資敬謂師事之如君父之敬也資於事

父以事君而敬同故曰資敬

性託夷遠少屏塵雜自非可以弘獎

風流增益標勝未嘗留心也

標高也言公性託簡易志在高遠少小屏棄塵

雜之事自非大勸風俗增益高勝之道者未嘗留心言志在大而不在小也

期歲而孤叔

父司空簡穆公早所器異

期歲一歲也言公一歲喪父也僧虔為侍中薨贈司

空謚簡穆早所器異言早以儉為不凡也

年始志學家門禮訓皆折衷於

公

志學年十五也

孝友之性豈伊橋梓夷雅之體無待韋弦

伯禽康叔朝於成王見乎周公三見而三笞之二子有駭色乃問於商子商子曰南山之陽有木名橋南山之陰有木名梓二子何不往觀之見橋木高而仰見梓木實而俯二子還告商子商子曰橋者父道也

梓者子道也言王儉有孝友之性自天而成不待見
橋梓而知也夷平也韋皮繩喻緩也弦弓弦喻急也
西門豹性急故佩韋以自緩董安于性緩故佩
弦以自急言王儉中和之性不待韋弦以成也

汝郁之幼挺淳至黃琬之早標聰察曾何足尚

後漢汝郁年五歲母

病不能飲食常抱持涕泣亦不肯飲食母憐之彊爲
餐誑言已愈郁察母顏色復不食其宗親異之挺拔
也淳至謂淳孝之甚也黃琬七歲失父祖父瓊育之
屬日食瓊以狀奏聞梁太后問所食多少瓊思其對
未知所出琬在傍曰何不言日食之餘如月之初瓊
大驚卽以其言對標立也言儉幼特又勝此二子

年六歲襲封豫寧侯拜日家人以公尚幼弗之先告

既襲珪組對揚王命因便感咽若不自勝

珪諸侯所執也組綬

所以繫印者也感咽謂悲甚不能言也

初宋明帝居蕃與公母武康公

主素不協及卽位有詔毀發舊塋投棄棺柩公以歿
固請誓不遵奉表啟酸切義感人神太宗聞而悲之

遂無以奪也

宋明帝以儉嫡母武康公主同太初巫蠱事不可以爲婦姑欲開冢離葬儉因

人自陳密以歿請故事不行太宗卽明帝也無以奪謂如其所請

初拜秘書郎遷太

子舍人以選尚公主拜駙馬都尉元徽初遷秘書丞

宋明帝大始中儉尚陽羨公主尚配也元徽年號也

於是采公曾之中經刊弘

度之四部依劉歆七略更撰七志

荀勗字公曾領秘書監與中書令張

華依劉向別錄整理錯亂又得汲冢竹書身自撰次以爲中經李克字弘度爲著作郎于時典籍混亂刪除頗重以類相從分爲四部甚有條貫秘閣以爲永制五經爲甲部史記爲乙部諸子爲丙部詩賦爲丁

部劉歆總羣書而奏其七略有輯略六藝略諸子略詩賦略兵書略術數略方技略言儉修書史也采拾

也刊蓋嘗賦詩云穆契匡虞夏伊呂翼商周自是始

有應務之迹生民屬心矣生民屬心言百姓皆有屬望之心也時司徒

袁粲有高世之度脫落塵俗見公弱齡便望風推服

歎曰衣冠禮樂盡在是矣時粲位亞台司公年始弱

冠年勢不侔公與之抗禮因贈粲詩要以歲暮之期

申以止足之戒粲答詩云老夫亦何寄之子照清襟

服闋拜司徒右長史儉遭所生母憂服闋也出為義興太守風

化之美奏課為最課考也最還除給事黃門侍郎旬

日遷尚書吏部郎參選昔毛玠之清公李重之識會

兼之者公也

玠音介魏毛玠為典選習李重為吏部郎識會謂識鑒也

俄遷侍中

以愍侯始終之職固辭不拜

愍侯即儉父僧綽也僧綽以密啟被害故謚愍

儉以父終此職固辭而不忍拜也

補太尉右長史時聖武定業肇基

王命

聖武謂齊高帝蕭道成也定業創業也肇始也

寤寐風雲實資人傑

寤寐

風雲謂朝夕思相感應以成其業者實資之也

是以宸居膺列宿之表圖緯

著王佐之符俄遷左長史

言儉為齊佐命也圖讖也緯星象也

齊臺既

建

謂蕭道成將受宋禪也

以公為尚書右僕射領吏部時年二十

八宋末艱虞百王澆季禮紊舊宗樂傾恒軌

艱虞猶荒亂也

漢季謂末世浮薄也

自朝章國紀典彝備物奏議符策文辭表

記素意所不蓄前古所未行皆取定俄頃神無滯用

太祖受命以佐命之功封南昌縣開國公食邑二千

戶

言典章文物皆平時所未儲蓄前代無可考見而能取辦于一時也神無滯用謂神用不滯也太祖

謂齊高帝也受宋禪故云受命

建元二年遷尚書左僕射領選如故

自營郤分司盧欽兼掌譽望所歸允集茲日

漢獻帝建始四

年始置左右僕射以執金吾營郤為左僕射郤音渴

晉盧欽為尚書僕射領吏部選舉稱為廉平言自營

郤盧欽二人以至於今其聲譽德望所尋表解選

言尋

上表請解詔加侍中又授太子詹事侍中僕射如故

吏部選舉事

固辭侍中改授散騎常侍餘如故太祖崩遺詔以公

爲侍中尚書令鎮國將軍永明元年進號衛將軍二

年以本官領丹陽尹

本官謂尚書令

六輔殊風五方異俗

六輔

謂京兆馮翊扶風河東河南河內五方者謂四方及帝都

公不謀聲訓而楚夏移

情

訓教也言不作聲譽教示而下人感其道德已移情於善淮南沛陳汝南郡西楚也潁川南陽夏人

之居故謂之夏

故能使解劍拜仇歸田息訟

後漢許荆兄子世嘗殺人其讐

操兵將殺世荆乃跪曰今願殺我以代世歟讐者曰許橡郡中稱君賢何敢相侵遂解劍而去前漢韓延壽爲東郡太守有兄弟訟田延壽乃自責闕閤不出視事於是訟者自相責讓終不敢爭

前郡尹

溫太真劉真長或功銘鼎彝或德標素尚

晉溫嶠字太真爲郡

尹後平王敦蘇峻之亂劉恢字真長為丹陽尹重莊
老功銘鼎彝彝謂溫太真德標素尚謂劉真長也素尚

謂清素言儉繼溫劉之跡而尹臭味風雲千載無爽丹陽同氣相感雖千載

高尚也亦無親加弔祭表薦孤遺遠協神期用彰世祀言儉

差爽親自

吊祭溫劉二尹上表奏薦其子時簡穆公薨以撫養

孫世祀即左傳盛德百世祀也簡穆公儉叔父

之恩特深恒慕表求解職有詔不許僧虔也儉少失

父母故云有撫養之恩國學初興華夷慕義經師人表允茲望

實復官謂居叔父之服今領國子祭酒三年解丹陽

却居官故云復官

尹領太子少傅餘悉如故挂服捐駒前良取則臥轍

棄子後子胥怨魏裴潛為兖州刺史嘗作一胡床及

去畱挂於官第凡所用物皆呼為服

王遜為上洛太守家有私馬生駒留以付郡謂所產故也前良取則言取前人以為法則也後漢侯霸為淮陽太守帝使徵詣都百姓號哭遮使車臥於轍中乞留霸一年百姓乃戒其乳婦棄其子以侯君當去不能全也後予即書僕我后意皇太子不矜天姿俯言儉解丹陽尹百姓亦如之

同人範師友之義穆若金蘭

皇太子武帝太子也名昭業時儉領國子祭酒

教胄子故謂之師友穆美也金喻堅蘭喻香

又領本州大中正頃之解職

頃之言四年以本號開府儀同三司餘悉如故

本號謂衛

將謙光愈遠大典未申

謂辭儀同三司大典盛典也

六年又申前

命儀同三司之命七年固辭選任帝所重違

選任尚書令也重違不忍違其

辭讓之詔加中書監猶參掌選事長輿追專車之恨志也

公曾甘鳳池之失

晉和嶠為中書令荀勗為監監令合同車而行嶠不禮勗常以意氣

加之每專車而坐專獨也勗遷為尚書令人皆賀之勗不悅謂人曰奪我鳳皇池何所賀也長輿嶠字也公曾勗字也言昔者任不得才故有專車而坐或不悅于遷奪今儉有德故專車者慙而追恨怨奪者愧而甘夫奔競之塗有自來矣以難知之性協易失之

情必使無訟事深弘誘公提衡惟允一紀于茲

衡平也所

以平輕重也言選曹以才授官似衡之平物故取以喻焉提執也允當也一紀十二年也

拔奇取

異興微繼絕

拔用奇異之才諸侯公卿有祚微者興之緒絕者繼之

望側階而

容賢候景風而式典

側階不敢正立言其禮賢也景風東風也淮南子云景風至則

施爵祿賞有功式法也言欲法此事以為典常也

春秋三十有八七年五月

三日薨于建康官舍皇朝軫慟儲鉉傷情

皇朝謂天子也軫痛

也儲謂太子也鉉謂三公也

有識銜悲行路掩泣豈直春者不相

工女寢機而已哉

五穀大夫歿秦國男女流涕童子不歌謠春者不相杵子產治鄭二

十年卒國人哭于巷婦人哭于機言儉之薨也豈值如此而已哉

故痛深衣冠悲纏

教義豈非功深砥礪道邁舟航沒世遺愛古之益友

悲纏謂纏繞于心也邁越也砥礪石也所以磨利其

器以喻利人舟航船也所以濟川喻濟人也子產為

古之遺愛劉向為古之益友以此比儉也追贈太尉侍中中書監如故給

節加羽葆鼓吹增斑劔六十人謚曰文憲禮也

漢官儀班

劔者以虎皮飾之謚法曰忠信接禮曰文博聞多能曰憲

公在物斯厚居身以約

利物不玩好絕於耳目布素表于造次室無姬姜門

多長者

左氏傳君子曰詩曰雖有姬姜無棄憔悴漢書陳平少時家貧然門外多長者車轍言其

遠女謁而親賢人也

立言必雅未嘗顯其所長持論從容未嘗

言人所短弘長

上聲

風流許與氣類

弘大也長誘掖也風流風雅士也許

與謂接引也氣類謂同氣類聚者也

雖單門後進必加善誘

單謂寒也

勗以

丹青之價弘以青冥之期

言以丹青之鳳青冥之龍勉人也

公銓品

人倫各盡其用

銓稱物也

居厚者不矜其多處薄者不怨

其少窮涯而反盈量知歸

莊子市南子曰君涉于江而浮於海望之而不見其

涯愈往而不知其所窮送君者皆自涯而反盈量知歸即飲河水之謂言隨人之所求而皆有以足其願

也皇朝以治定制禮功成作樂思我民譽緝熙帝圖

左傳六官之長皆民譽也雖張曹爭論於漢朝荀摯競爽於晉世

無以仰模淵旨取則後昆東觀漢記章帝詔曹褒案漢舊儀制漢禮張酺以為

褒制禮有似異端之術晉書太尉荀顗先受太祖勅制禮太康初付尚書郎摯虞討論之虞表所宜增損

條目新昔異狀凡十五事每荒服請罪遠夷慕義宣

爽差也言皆不能及儉也威授指實寄宏略荒服遠國也宣國之威授指謂授指揮也理積則神無

忤往事感則悅情斯來即所謂渙然冰釋怡然理順也無是已之心

事隔於容諂罕愛憎之情理絕於毀譽容諂謂容悅諂媚也造

理常若可干臨事每不可奪言性多寬和故若可求而臨事有主故不可奪

約已不以廉物弘量不以容非約於處已而厚於及物其量雖弘而不容

人之攻乎異端歸之正義公生自華宗世務簡隔言

非於富貴之宗宜不諳世故也至於軍國遠圖刑政大典既道在廊

廟則理擅民宗理擅民宗謂政理之善獨為人所宗依也若乃明練庶務

鑒達治體懸然天得不謀成心求之載籍翰牘所未

紀訊之遺老耳目所不接至若文案自環主者百數

皆深文為吏積習成奸畜筆削之刑懷輕重之意文案

即文書案卷也環繞也主者即今之承行吏也深文為吏積習成奸言皆熟於舞文者也筆削如云出入

人罪也輕重持兩端也公乘理照物動必研幾研幾謂研

窮其幾微之際

當時嗟服若有神道

人歎服若有神明之道也

豈非希世

之儁民瑚璉之宏器

以上皆美儉也

昉行無異操才無異能

得奉名節迄將一紀

此任昉自序其情也得奉名一節謂昉與儉交游也迄盡也

言之譽東陵侔於西山一盼之榮鄭璞踰於周寶

莊子

曰盜跖死利於東陵之上法言曰夷齊無仲尼則西

山餓夫戰國策應侯曰鄭人謂王之未理者為璞周

人謂鼠之未腊者為璞周人懷璞過鄭問賈曰欲賈

璞乎鄭賈曰欲之出其璞示之乃鼠也因謝而不取

尚書曰弘璧琬琰在西序皆歷代

士感知已懷此何

傳寶昉自謙不才濫見推譽也

極出入禮闈朝夕舊館

禮闈尚書省也

瞻棟宇而興慕撫身

名而悼恩公自幼及長述作不倦固以理窮言行事

該軍國豈直彫章縉采而已哉若乃統體必善綴賞

無地

無地謂不擇地遇之則爲勝也

雖楚趙羣才漢魏衆作曾何足

云昉嘗以筆札見知思以薄技效德是用綴緝遺文

永貽世範爲如干卷

如干卽若干也

所撰古今集記今書七

志爲一家之言不列于集集錄如左

五

頌

○聖主得賢臣頌

王襄既為益州刺史王襄作十和樂職宣布詩襄因奏言襄有

軼才上乃徵襄既至詔為聖主得賢臣頌

王褒

夫荷旃被毳者難與道純綿之麗密

荷負也旃氊也被服也純綿繒

帛也羹藜哈糗者不足與論太牢之滋味

藜野菜也糗麥飯也太牢

牛也今臣僻在西蜀生於窮巷之中長於蓬茨之下無

有游觀廣覽之知顧有至愚極陋之累不足以塞厚

望應明旨雖然敢不略陳愚心而抒情素記曰恭惟

春秋法五始之要在乎審已正統而已

此頌之記上為謙辭此立

文首惟思也言敬思春秋也五始元者氣之始春者
四時之始王者受命之始正月者政教之始公即位
者一國之始五者在乎君王審已夫賢者國家之器
而行之正位以統理天下而已

用也所任賢則趨舍省而功施普器用利則用力少

而就效衆故工人之用鈍器也勞筋苦骨終日矻矻

矻矻勤作也

及至巧冶鑄干將之璞清水淬

子會

其鋒越砥

歛其鏐

巧冶善鑄劍人也干將劍名璞劍未理者淬謂燒刃令熱漬於水中也鋒刃也越砥磨石

名也歛謂磨也

水斷蛟龍陸剗犀革忽若篲汜畫塗

剗章充切篲音

遂剗斬也犀獸名革皮也篲篲也汜灑地也塗泥也斬斷蛟犀若以篲掃灑地以刀畫泥言器之利也

如此則使離婁督繩公輸削墨雖崇臺五層延袤

茂

百丈而不溷者工用相得也

溷胡困切督正也削度也延長也衰廣也溷亂

也以是利器而用之於良工所謂用力少而就効衆也

庸人之御驚馬亦傷吻

弊策而不進於行胸喘膚汗人極馬倦

吻馬口也策鞭也

及

至駕齧膝驂乘旦

齧膝乘旦皆良馬名驂亦駕也

王良執靶韓哀附

輿

靶音霸謂轡也王良韓哀古善御者

縱騁馳驚忽如影靡

靡沒也言縱騁奔馳

忽如日景之疾沒也

過都越國蹶如歷塊

蹶疾也言過都國疾如行歷一小塊之間

追奔電逐遺風

遺風風之疾者也

周流八極萬里一息何其

遼哉人馬相得也

遼遠也上以利器良工之相得此以名馬善御之相得以發得字之

義見聖主得賢臣亦如此也

故服絺綌之涼者不苦盛暑之鬱燠

襲狐貉之煖者不憂至寒之悽愴何則有其具者易

其備

鬱燠熱也襲衣也狐貉裘也悽愴寒也

賢人君子亦聖王之所以

易海內也

易即上易其備之易

是以嘔

吁喻

受之開寬裕之

路以延天下之英俊也夫竭智附賢者必建仁策索

人求士者必樹伯迹昔周公躬吐握之勞故有圉空

之隆

圉空謂圉圉空虛也

齊桓設庭燎之禮故有匡合之功

圉空

所謂建仁策也匡合所謂樹伯迹也韓詩外傳曰齊桓公設庭燎為士之欲造見者莽年而士不至於是東鄙人有以九九見者桓公使戲之曰九九足以見乎鄙人曰臣不以九九足以見也臣聞君設庭燎以待士莽年而士不至夫士之所以不至者以君天下之賢君也四方之士皆自以為不及君故不至也夫

九九薄能而君猶禮之况賢於九九者乎
桓公曰善乃禮之朞月四方之士並至

由此觀之

君人者勤於求賢而逸於得人人臣亦然昔賢者之
未遭遇也圖事揆策則君不用其謀陳見惴誠則上
不然其信進仕不得施效斥逐又非其愆是故伊尹
勤於鼎俎太公困於鼓刀百里自鬻寧子飯牛離此
患也及其遇明君遭聖主也運籌合上意諫諍則見
聽進退得關其忠任職得行其術去卑辱奧濞而升
本朝離蔬釋蹻而享膏粱

奧音郁幽也蹻繩屨也言
去辱而榮自賤而貴也

剖符錫壤而光祖考傳之子孫以資說士

言有爵土
而光前裕

後爲士類所喜
談而樂道也

故世必有聖智之君而後有賢明之

臣虎嘯而谷風冽龍興而致雲氣

管輅別傳曰龍者陽精以潛于陰幽

靈上通和氣感神二物相扶故能興雲虎者陰精而居于陽依木長嘯動於巽林二數相感故能運風

蟋蟀俟秋吟蜉蝣出以陰

蟋蟀蜉蝣皆蟲也候時而鳴知陰以出言如賢人待

明時而見也

易曰飛龍在天利見大人

乾九五辭龍以喻大人言龍飛在天

喻聖德之顯故天下皆利見之

詩曰思皇多士生此王國

毛詩大雅文皇天也

思願也願天多生賢人於邦也

故世平主聖俊乂將自至若堯舜禹

湯文武之君獲稷契皋陶伊尹呂望之臣明明在朝

穆穆列布聚精會神相得益章雖伯牙操籟鐘蓬門

子彎烏號猶未足以喻其意也

籥音込二十四鐘各有節奏聲不常故曰

籥鐘黃帝弓曰烏號言君臣道合德意諧和則雖伯牙操琴蓬門子彎弓其音韻合和弓矢相應亦未足以喻

也

故聖主必待賢臣而弘功業俊士亦俟明主以

顯其德上下俱欲懽然交欣千載一會論說無疑翼

乎如鴻毛遇順風沛乎若巨魚縱大壑其得意如此

則胡禁不止曷令不行化溢四表橫被無窮遐夷貢

獻萬祥必臻是以聖主不徧窺望而視已明不殫傾

耳而聽已聰

言賢臣爲君耳目故也殫盡也

恩從祥風翔德與和氣

游太平之責塞優游之望得遵游自然之勢恬淡無

爲之場

遵法也言法自然之道也

休徵自至壽考無疆雍容垂拱

永永萬年何必偃仰屈信若彭祖煦噓呼吸如喬松

眇然絕俗離世哉

偃仰屈伸道氣也彭祖多壽者煦噓呼吸鍊氣也王子喬赤松子皆

仙也

詩曰濟濟多士文王以寧蓋信乎其以寧也

○趙克國頌

漢成帝時西羌嘗有警上思將帥之臣追美克國乃召黃門郎楊雄即克

國圖畫

而頌之

楊雄

明靈惟宣戎有先零先零猖狂侵漢西疆

明靈聖明神靈也宣

宣帝也先零羌名

漢命虎臣惟後將軍整我六師是討是震

音真叶韻詩曰進厥虎臣言其猛如虎也克國既臨焉後軍將軍故曰後將軍六師六軍也震懼也

既臨

其域諭以威德

克國至西部都尉府欲以威信招降罕开乃上疏請因屯田致穀威德兼

行

有守矜功謂之弗克

有守謂酒泉太守辛武賢也

請奮其旅于

罕之羌

罕羌名武賢言但擊罕羌先零自降

天子命我從之鮮陽

宣帝使克

國共討罕開于鮮水陽

營平守節屢奏封章

克國封營平侯屢奏封章言屯田之

便也料敵制勝威謀靡亢

亢拒也言其威與謀無有能拒之者

遂克西戎

還師于京鬼方賓服罔有不庭

鬼方即漢先零戎也

昔周之宣

有方有虎詩人歌功乃列于雅

宣謂周宣王也方虎謂方叔召虎也詩小

雅云方叔蒞止其車三千大雅云江漢之潏王命召虎

在漢中興克國作武赴

赴桓桓亦紹厥後

時漢至宣帝稱中興赴赴桓桓武貌

○出師頌

後漢鄧騭字昭伯女弟為和熹皇后安帝立騭為虎賁中郎將封上蔡侯涼部

叛羌搖蕩西州詔騭將兵擊之車駕幸平樂觀餞送騭西屯漢陽征西校尉任尚與羌戰

大敗之遣中郎將迎拜騭為大將軍

史岑

岑字孝山後漢沛國人

茫茫上天降祚有漢兆基開業人神攸贊

兆始也

五曜

宵映素靈夜歎

五曜五星也宵映謂聚東井也素靈夜歎即老嫗哭白帝子事也

皇

運來授萬寶增煥歷紀十二天命中易

高祖至孝平十有二世

西零不順東夷遘逆

西零西羌也遘作也

乃命上將授以雄戟

上將鄧騭也

桓桓上將實天所啟允文允武明詩悅禮憲

章百揆為世作楷昔在孟津惟師尚父

尚父太公也

素旄

一麾渾一區宇

尚書王右軍曰旄以麾

蒼生更始朔風變楚

蒼生

猶黔首也朔北方也楚南方也史記子貢問樂曰舜彈五絃之琴歌南風之詩而天下治紂為朝歌北鄙之音身死國亡何也夫南風之詩者生長之音舜樂好之故天下治也北者敗也鄙者陋也紂樂好之故身死國亡也

薄伐獫狁至于太原

毛詩小雅文也薄伐言逐出之而已獫狁北狄

也詩人歌之猶歎其艱况我將軍窮域極邊鼓無停

響旗不斃塞澤霑遐荒功銘鼎鉉

音玄叶韻鼓旗二句言非師老也鼎

有銘銘者論議其所成之功伐也

我出我師于彼西疆天子餞我路

車乘黃言念伯舅恩深渭陽

餞送行也伯舅也詩云我送安帝長舅也

舅氏曰至渭陽何以贈之路車乘黃

介珪既削列壤

酬勲

珪諸侯所執長尺二寸削也言將封騰也列壤謂分土也

今我將軍啟土

上郡

啟開也上郡謂騰所封

傳子傳孫顯顯令問

脂劉祗桂
婦間出上

車千軸無疆臨今問

言性無也。根難詰。合土也。

今拜張軍士

莊子集注卷之四

今拜張軍士

馬車山乘黃驥車馬黃池

介珪預聞成樂

日全影則向以觀之細車

介珪預聞成樂

○酒德頌

劉伶

伶字伯倫晉沛國人也

有大人先生以天地爲一朝萬期爲須臾日月爲肩

牖八荒爲庭衢

言志廣大也天地自開闢以來也萬期萬歲之期也

行無轍跡

居無室廬幕天席地縱意所如止則操卮執觚動則

挈榼提壺

操挈皆執也卮觚壺皆酒器也榼乘果肴以侑酒者

唯酒是務焉知

其餘有貴介公子搢紳處士

介大也

聞吾風聲議其所

以乃奮袂攘襟怒目切齒陳說禮法是非鋒起先生

於是方捧罍承槽銜杯漱醪奮髯踣踞枕麴藉糟

踣踞

展足倚據而坐也藉鋪也

無思無慮其樂陶陶兀然而醉豁爾而

醒靜聽不聞雷霆之聲熟視不覩泰山之形不覺寒

暑之切肌利欲之感情俯觀萬物擾擾焉如江漢之

載浮萍二豪侍側焉如蜾蠃之與螟蛉

二豪公子處士也隨已而

化類蜾蠃之變螟蛉也螟蛉桑蟲也蜾蠃即蜂蟲也蜂蟲無子取桑蟲蔽而蟻之幽而養之祝曰類我久則化而成蜂矣言公子處士亦為我所化也

○漢高帝功臣頌

相國酈文終侯沛蕭何相國平陽懿侯沛曹參太子少傅留文

成侯韓張良丞相曲逆獻侯陽武陳平楚王

淮陰韓信梁王昌邑彭越淮南王六黥布趙

景王大梁張耳韓王韓信燕王豐盧綰長沙

文王吳芮荆王沛劉賈太傅安國懿侯王陵

左丞相絳武侯沛周勃相國舞陽侯沛樊噲

右丞相曲周景侯高陽酈商太僕汝陰文侯

沛夏侯嬰丞相潁陰懿侯睢陽灌嬰代丞相

陽陵景侯魏傳寬車騎將軍信武肅侯靳歙

大行廣野君高陽酈食其中郎建信侯齊劉

敬太中大夫楚陸賈太子太傅穰嗣君薛叔

孫通魏無知護軍中尉隨何新成三老董公

轅生將軍紀信御史大夫沛周苛平國君侯

公右三十一人與定

天下安社稷者也

陸機

芒芒宇宙上塿

楚錦

下黷波振四海塵飛五岳九服徘徊

徊三靈改卜

天以清為常地以靜為本今上塿下黷言亂常也塿濁也黷嫖也波振塵飛以

喻亂也徘徊謂人無主不知所從也三靈天地人也言天惡秦亂改卜清平也

赫矣高祖肇

載天祿

赫盛也肇始也載運也

沈跡中鄉飛名帝錄

高帝中陽里人故云

中鄉也飛名帝錄謂應圖識也

慶雲應輝皇階授木

言漢之歷運為周木德所授也

龍興泗濱虎嘯豐谷

泗濱謂高帝嘗為泗水亭長也豐邑高帝鄉也

彤雲晝

聚素靈夜哭

彤雲晝聚謂帝所居上有雲氣也素靈夜哭即老嫗哭白蛇事也

金精

仍頽朱光以渥

金精秦也朱光漢也渥流也

萬邦宅心駿民效足

宅居也言天下之人懷高帝寬仁之德于心而羣賢如騁馬足以效用也

堂堂蕭公王跡

是因綢繆敵后無競惟人

綢繆親密貌敵后指高祖也

外濟六師

內撫三秦

三秦關中地也

拔奇夷難邁德振民

何拔韓信為將故云拔奇

夷乎也邁種德也

體國垂制上穆下親

班固蕭何述曰營都立宮定制循文重威

則上穆刑約則下親

名蓋羣后是謂宗臣

羣后謂諸立功者

平陽樂道

在變則通

曹參好黃老之術故云樂道

爰淵爰嘿有此武功

淵嘿沈靜

也

長驅河朔電擊壤東

秦將王離圍鉅鹿參擊離大破之又擊三秦軍壤東破之

壤東地名

協策淮陰亞跡蕭公

魏王豹反曹參以假丞相別與韓信東攻魏將孫道

又從信擊趙又從信擊龍且協合也亞次也

文成作師通幽洞冥

張良謚曰文成

侯凡不言姓名皆所封邑及號謚也餘皆類此良自言以三十舌為常者師幽謂受兵法於黃石公也

永言配命因心則靈

言配合天命籌策因心而出如神靈然

窮神觀化

望影揣情鬼無隱謀物無遁形

言其觀察事變見於形影已能揣度其情

故雖鬼神亦不能隱謀萬物皆莫能逃形

武關是闢鴻門是寧

高帝與良西入武關

良曰臣聞秦將屠者賈豎易動以利乃持重寶啗秦將果欲連和高帝欲聽之良曰此其將欲叛士卒恐不從不如因其懈擊之高帝乃擊秦軍大破之項羽至鴻門欲擊高帝良因要項伯見高帝高帝令伯具言不敢背項

隨難滎陽即謀下邑

滎陽下邑地名

銷印基

忌

廢推齊勸立

酈食其請復立六國後高帝趣刻印良曰誰為陛下畫此計者大事去矣且楚

強六國復從之陛下焉得而臣之高帝曰趣銷印韓信破齊欲自立為齊王高帝怒良勸高帝因封之基

教也運籌固陵定策東襲三王從風五侯允集

高帝與齊王信

魏相國彭越期會擊楚至固陵不會高帝謂張良曰
諸侯不從奈何良曰今能取睢陽以北至穀城以王
彭越從陳以東傳海與齊王信則楚易敗也於是韓
信彭越皆引兵來黥布亦會三王韓信彭越黥布也
史記曰漢部五諸侯兵東伐楚故云五
霸楚實喪皇
侯舊註作呂馬童諸人於允集義未妥

漢凱入

楚喪謂羽人也凱入謂戰勝凱歌而還也

怡顏高覽弭翼鳳戢託

跡黃老辭世却粒

謂功成名遂身退也弭止也戢藏也張良嘗託跡黃帝老子之術却

粒絕穀也

曲逆宏達

陳平封曲逆侯曲音去逆音遇

好謀能深游精杳漠

神跡是尋重玄匪奧九地匪沈

重玄天也奧深也言平之用智天地不能

為深沈也

伐謀先兆擠響于音

兆為謀始響為音初言欲伐其謀則先於其朕兆之

始欲排擠其響則先於其音聲之微

奇謀六奮嘉慮四迴

陳平凡六出奇計時頗秘

之世莫得聞法言注陳平規主以足離項于懷謂平

用奇策四皆權謀非正也躡高

帝足勸以齊王韓信也格人乃謝楚翼實摧謂范增

離項即捐金行反間也謝病去楚而韓王窘執胡馬洞開窘執即偽游雲夢

楚羽翼摧折解圍迎文以謀哭高以哀文文帝也高高后也惠帝

也相用張辟疆計灼灼淮陰靈武冠世謂韓信也灼灼

高后哭乃哀策出無方思入神契奮臂雲興騰跡虎噬臨險必夷

摧剛則脆肇謀漢濱還定渭表漢濱謂高帝就國漢

京索既扼引師北討信發兵與漢王會濟河夷魏

登山滅趙以木罌渡軍襲安邑虜魏王豹選輕騎二

千人待未渡者間道登山望趙軍拔趙賊

立漢幟用以禽趙王歇

威亮火烈勢踰風掃

亮信也踰過也

拾代如遺

偃齊猶草

破代齊二國如拾遺於地草偃於風

二州肅清四邦咸舉

魏趙

屬冀州齊代屬青州

乃眷北燕遂表東海

信用廣武君策發使使燕燕從風而靡信

平齊後高帝立信為齊王表東海以太公擬之也

克滅龍且

子余

爰取其旅

龍且

項羽將也信滅之旅眾也

劉項懸命人謀是與念功推德辭通絕

楚

蒯通說信曰當今兩主懸命於足下足下為漢則漢勝為楚則楚勝故云劉項懸命也人謀謂蒯通

說信反漢為楚三分天下信曰漢授我上將軍印言聽計用背之不祥言念已之功推高祖之德辭蒯通

所說以

彭越觀時弢迹匿光人具爾瞻翼爾鷹揚

與

絕楚

韜字通陳涉初起或人問越曰豪傑相立叛秦公可效之越曰兩龍相鬪且待之故云藏跡隱光後佐高

帝故言翼

爾鷹揚

威凌楚域質委漢王靖難河濟即宮舊梁

即就也宮居也項氏既滅高帝封越為梁王越初為相國將兵略定梁地後封之故云舊梁也

烈烈

黥布耽耽其眄

烈烈猛也眄眄虎視也

名冠彊楚鋒猶駭電

楚兵

常勝功冠諸侯者以布數以少敗眾也

覩幾蟬蛻悟主革面

言布見幾去楚歸漢

亦如蟬蛻去其殼也悟覺也革改也悟主悟漢主之當從也革面改而從漢也

肇彼梟風翻

為我扇

肇始也彼謂項羽也梟惡鳥也我謂漢也言始為項羽用後乃翻飛而來為漢之助也

天命方輯王在東夏矯矯三雄至于垓下

三雄韓信彭越英布

也垓下地名

元凶既夷寵祿來假

元凶謂項羽夷平也假至也

保大全

祚非德孰可謀之不臧舍福取禍

安於大位而能全福者非德不可謀

之不善福變為禍矣天命以下數句合張耳之賢有
信越布而言因三人皆不克令終故也

聲梁魏

張耳大梁人少時及魏公子無忌為客

士也罔極自詒伊媿

音詒

怡言士之結交當堅至于無窮豈可二三其德以相誅而自詒其媿此謂陳餘也

俯思舊恩

仰察五緯

耳曰漢王與我有故也而項王強立我我欲之楚甘公曰漢王之入關五星聚東井

先至必王耳乃走漢五緯五星也

脫跡達難披榛來泊改策西秦報

辱北冀

脫避也難謂與陳餘戰敗也泊至也披榛言披荆棘也改策西秦歸漢祖於秦中也報辱

謂破趙斬陳餘於泚水上

悴葉更輝枯條以肄

以木為喻

也斬而復生曰肄謂耳敗走已如悴葉枯條而歸漢破趙是更有光而復生也

王信韓孽宅

土開疆我圖爾才越遷晉陽

韓王信故韓襄王孽孫也漢立為韓王上以信

壯武乃更以太原郡為韓國徙信以備胡都晉陽

盧綰自微婉變我皇

綰與高祖

同日生微時相愛及貴綰出入高帝臥內婉變相親貌我皇高帝也

跨功踰德祚爾輝

章

跨越也踰過也祚福也言其所封爵土已過其功德蓋上所私念也

人之貪禍寧為

亂

後綰入匈奴中

吳芮之王祚由梅鋗功微勢弱世載

忠賢

天下初叛秦吳芮率越人舉兵以應諸侯沛公攻南陽遇芮之將梅鋗與偕攻析酈上以鋗有

功武關故德芮徙為長沙王

肅肅荆王董我王軍

謂劉賈也董督也

我圖

四方殷薦其勲

漢王追項籍至固陵賈使人間招楚大司馬周殷周殷反楚佐賈

庸

親作勞舊楚是今往踐厥宇大啟淮濱

賈高帝從兄故曰親也祚

勞者謂加福於功勞之臣分楚地而為荆國淮水在荆地濱水濱也

安國違親悠悠我

思依依哲母既明且慈引身伏劔永言固之

謂王陵也陵以

兵屬漢項羽取陵母寘軍中陵使至則東鄉坐陵母欲以招陵陵母私送使者泣曰為老妾語陵善事漢王漢王長者毋以老母故持二心妾以灰送使者遂伏劔而灰淑人君子實邦之基

義形於色憤發于辭主亾與亾末命是期

陵為人少文任氣好

直言高后欲立諸呂為王問陵陵曰高皇帝刑白馬盟曰非劉氏而王者天下共擊之今王呂氏非約也

絳侯質木多略寡言

謂周勃也

曾是忠勇惟帝攸歎

平聲高帝

曰安劉氏者必勃也

雲鶩靈丘景逸上蘭平代禽豨奄有燕韓

雲馳景疾言其用兵之神速也陳豨反勃擊豨靈丘破之斬豨定代郡九縣燕王盧綰反勃破綰軍上蘭定上谷右北平遼西遼東寧亂以武斃呂以權滌穢紫宮徵帝太

原

高后崩呂產秉權欲危劉氏勃與丞相平誅諸呂曰請得除宮乃與太僕勝公入宮載少帝出遂奉

天子法駕迎皇帝代邸

實惟太尉劉宗以安挾功震主自古所

難勲耀上代身終下落

言勃免相國出於下落而薨也諸侯之國曰下落即所封

絳是也

舞陽道迎延帝幽藪

謂樊噲也噲在沛蕭何使迎高帝立為沛公幽藪即

側微也

宣力王室匪惟厥武總干鴻門披闥帝宇聳顏

誚項掩淚寤主

項羽在鴻門亞父謀欲殺沛公噲聞事急乃持楯入曰沛公先入定咸陽

以待大王大王聽小人之言與沛公有隙臣恐天下

疑大王也故云誚項高帝嘗病臥禁中詔戶者無得

入羣臣噲乃排闥直入流涕曰始陛下與臣等起豐

沛定天下何其壯也今天下已定又何憊也故云寤

主

曲周之進于其哲兄俾率爾徒從王于征

謂鄭商也兄謂

因食其進也初陳勝起兵商以數振威龍脫據武靖
千衆屬高帝略地故云率徒從征

城六師實因克茶禽黥

龍脫墉城皆地名也據猶用也茶臧茶也黥英布也猗

歟汝陰綽綽有裕

謂夏侯嬰也猗美也綽裕言其才器寬閒也

戎軒肇跡

荷策來附

戎軒兵車也謂高帝初起時以嬰爲太僕嘗奉車故云肇跡荷策謂負鞭策以奉事

也馬煩轡殆不釋擁樹皇儲時又平城有計

嬰從擊項籍高

帝不利馳去見孝惠魯元載之高帝急馬罷取兩兒棄之嬰常收載擁樹馳擁樹謂抱小兒也平城之難冒頓旣開一角高帝出欲馳嬰固請徐行弩皆持滿外鄉卒以得脫有計之計舊誤作謀改正頽陰

銳敏屢爲軍鋒

謂灌嬰也鋒謂先鋒也

奮戈東城禽項定功

項籍

敗垓下嬰追至東城破之所將卒斬籍

乘風藉響高步長江收吳引淮

光啟于東

言晏乘勢假藉威聲渡江破吳都定豫章會稽還定淮北遂大開東土

陽陵

之勲元帥是承

謂傳寬也元帥謂曹參也言承帥令以定齊地遂得封也

信武薄

伐揚節江陵夷王殄國俾亂作懲

謂斬歙也

恢恢廣野誕

節令圖進竭嘉謀退守名都東規白馬北距飛狐卽

倉敖庾據險三塗

廣野君酈食其也漢王數困滎陽成皋食其曰願足下急進兵收取

滎陽據敖庾之粟塞成皋之險杜太行之道距飛狐之口守白馬之津以示諸侯形勢

轡軒東

踐漢風載徂身歿于齊非說之辜

燕趙已定唯齊未下帝使食其說齊

齊王田廣爲罷歷下兵韓信乃襲齊齊聞漢兵至以爲食其賣已乃烹食其轡軒使車也東踐謂東以向齊也載則也徂往也言漢之威風則往也雖身歿于齊非游說之罪我皇實念言詐爾

孤

高祖念其功封子芥為高梁侯

建信委輅

胡格

被褐獻寶指明周漢

銓時論道移帝伊洛定都鄴鎬柔遠鎮邇實敬攸考

婁敬脫輅見虞將軍曰臣願見上言便宜虞將軍欲與鮮衣敬曰臣衣帛衣帛見衣褐衣褐見不敢易衣

虞將軍入言于上上召見婁敬謂上曰陛下取天下與周異而都雒陽不便不如入關據秦之固是日車

駕西都長安銓所以稱物也抑抑陸生知言之賈

安鎮遠近實敬之所考定也抑抑陸生知言之賈

賈也抑抑善威儀也貫通也往制勁越來訪皇漢

中國初定尉佗平南越因王之

儀也貫通也往制勁越來訪皇漢

高帝使賈賜佗印為南越王附會平勃夷凶翦亂

賈卒令佗稱臣奉漢約歸報

欲危劉氏陳平患之賈勸平交

權太尉及誅呂氏賈有力焉所謂伊人邦家之彥

毛詩謂伊人于焉逍遙彼已之子邦

之彥今伊人猶言此人也彥美也百王之極舊章

靡存

謂叔孫通也言漢承百王敝極之時禮儀舊章皆無存者通乃復修之

漢德雖朗

朝儀則昏穆嗣制禮下肅上尊

漢拜通為博士號穆嗣君言其制禮儀下

敬而上尊也

穆穆帝典煥其盈門風晞三代憲流後昆

晞望

也憲法也

無知叡敏獨昭奇跡察倖蕭相貺同師錫

謂魏無知

也蕭何進韓信無知進陳平故曰倖也貺猶慶也錫舉也

隨何辯達因資於敵紓

漢披楚唯生之績

黥布本屬項羽漢之敵也而何說之背羽歸漢是因資於敵也舒成

也披毀也

皤皤董叟謀我平陰三軍縞素天下歸心

此謂新成

三老董公也皤皤髮白也

袁生秀朗沈心善照漢旆西振楚威自

撓大略淵回元功響效邈哉惟人何識之妙

袁生說高帝曰

願君出武關項王必引兵南走王深壁令榮陽成皋間且得休王乃復走榮陽如此則楚所備者多力分漢得休復與之戰破楚必矣高帝從其計出軍宛紀葉間羽及聞高帝在宛果引兵南惟人猶此人也

信誑項軺軒是乘攝齋赴節用歿孰懲身與烟消名

與風興

項羽急攻榮陽漢計無所出紀信曰事急矣臣請誑楚可以間出信乃乘王車服王衣誑

為漢王降以此高帝得與數十騎出項羽遂燒殺信攝齋攝衣也懲恐也雖身隨烟滅而忠烈之名與風俱興

周苛慷慨心若懷冰

言如冰之潔也

形可以暴志不可

凌

高帝使苛守榮陽楚破榮陽欲令將苛罵不降項王怒烹苛

貞軌偕沒亮跡雙

升帝疇爾庸後嗣是膺

偕沒雙升合紀信周苛而言

天命雖順王

心有違懷親望楚永言長悲侯公伏軾皇媼來歸是

謂平國寵命有輝

王心有違謂高帝父母並為項羽軍所執也侯公為高帝往說羽父

母皆得歸漢號侯公為平國君故云寵命伏軾謂乘車而往也皇太上皇也媼謂高帝母也此上三十一

人頌畢此下

震風過物清濁效響

言風過則物無清濁皆應聲響亦如

功臣各效其才也

大人于興利在攸往

利往即利見之意

弘海者川

崇山惟壤

海所以大者衆川成之山所以高者積土成之言帝王成功亦須衆賢也

韶護

錯音衮龍比象

韶護樂名衮龍章服也錯音比象謂集羣策羣力以成王業猶五音迭奏

而成樂五色相輝而成象也

明明衆哲同濟天網劔宣其利鑒獻

其朗

鑒鏡也劔利喻武勇鏡朗喻智略也

文武四克漢祚克廣

四克四方克滿

也悠悠遐風千載是仰

贊

○東方朔畫像贊 并序

夏侯湛

湛字孝若譙國人才華富盛早有名譽為散騎常侍

大夫諱朔字曼倩平原厭次人也

地理志無厭次縣而功臣表有厭次

侯爰類疑地理誤也

魏建安中

漢獻帝改興平三年為建安元年今云魏疑誤

分厭次

以為樂陵郡故又為郡人焉事漢武帝漢書具載其

事先生瓌瑋博達思周變通以為濁世不可以富樂

也故薄游以取位

濁世謂武帝奢侈無度也

苟出不可以直道也

故頡頏以傲世

頡頏自縱貌

傲世不可以垂訓也故正諫

以明節明節不可以久安也故詼諧以取容

詼嘲也口回切

諧和也正諫若辟戟言董偃失罪

三之類詠諧王羲之書作談諧

潔其道而穢其跡

班固漢書贊

朔穢德似隱

清其質而濁其文弛張而不為邪進退

而不離羣若乃遠心曠度瞻智宏材

瞻多也

侗儻博物

觸類多能合變以明筭幽贊以知來自三墳五典八

索九丘陰陽圖緯之學百家衆流之論周給敏捷之

辯支離覆逆之數

支離卜也覆謂射覆逆謂逆刺豫知前事也數術也

經脈藥

石之藝射御書計之術

計數也

乃研精而究其理不習

而盡其功經目而諷於口過耳而闇於心

闇疑也

夫其

明濟開谿包含弘大陵轢

歷

卿相嘲哂豪傑籠罩靡

前跽

若

籍貴勢

陵犯也轢踐也嘲哂謂戲弄也跽籍猶踐踏也

出不休顯

不休

顯不以得位為喜也

賤不憂戚戲萬乘若寮友視儔列如草芥

雄節邁倫高氣蓋世可謂拔乎其萃游方之外者已

方常也言彼游心於常教之外

談者又以先生噓吸冲和吐故納新

養形神也

蟬蛻龍變棄俗登仙神交造化靈為星辰

世以朔為

太白星

此又奇怪恍惚不可備論者也大人來守此國

此國謂樂陵也湛父為樂陵郡守

僕自京都言歸定省

京都洛陽也謂湛來此省

也觀先生之縣邑想先生之高風徘徊路寢見先生

之遺像

路寢謂廟也

逍遙城郭觀先生之祠宇慨然有懷

乃作頌焉其辭曰矯矯先生肥遯居貞退不終否進

亦避榮臨世濯足希古振纓涅而無滓既濁能清

滓穢

也濁清謂外濁內清也

無滓伊何高明克柔能清伊何視汙若

浮樂在必行處儉罔憂

儉謂困窮也

跨世凌時遠蹈獨游

跨越也蹈步也

瞻望往代爰想遐蹤邈邈先生其道猶龍

邈邈

遠也猶龍用老子比之也

染迹朝隱和而不同

朔曰如朔所謂避俗於朝廷間

栖

遲下位聊以從容我來自東言適茲邑敬問墟墳企

佇原隰

企佇謂望立也高平曰原下濕曰隰言求朔故居及丘墓之處也

墟墓徒存

精靈永戢

戢藏也

民思其軌祠宇斯立徘徊寺寢遺像

在圖

寺寢廟也
圖畫也

周旋祠宇庭序荒蕪

東西廂曰序周旋王羲之書作

游周棖棟傾落草萊弗除肅肅先生豈焉是居

言其豈於此居

是居弗形悠悠我情昔在有德罔不遺靈天秩有禮

神監孔明彷彿風塵用垂頌聲

文選纂註

卷十

廿八

柳堂外聞新風動用垂於筆

景岳集解

用油
珠

新刊

年

劍南集

卷之四

周鼎

外此

1873

五

卷之四

三

卷之四

子游

帝王壽

大書

This image shows a blank, aged, cream-colored page, likely an endpaper or flyleaf of a book. The paper has a slightly textured appearance with some minor discoloration and dark smudges, particularly along the edges, suggesting it is old. There is no text or other markings on the page.

○三國名臣序贊

有序魏志九人蜀志四人吳志七人荀彧字文若諸葛亮字孔

明周瑜字公瑾荀攸字公達龐統字士元張

昭字子布袁渙字曜卿蔣琬字公琰魯肅字

子敬崔琰字季珪黃權字公衡諸葛瑾字子

瑜徐邈字景山陸遜字伯言陳羣字長文顧

雍字元歎夏侯玄字泰初虞翻字

仲翔王經字承宗陳泰字玄伯

袁宏

宏字彥伯陳郡人爲東郡守

夫百姓不能自治故立君以治之明君不能獨治則

爲臣以佐之然則三五迭隆歷世承基

三五三皇五帝也歷世後

也代揖讓之與干戈文德之與武功莫不宗匠陶鈞而

羣才緝熙元首經略而股肱肆力

元首君也經略經營也股肱臣也肆

陳也

遭離不同跡有優劣

遭離遇也言揖讓于戈所遇時亦不同而跡有優劣

至

於體分冥固道契不墜風美所扇訓革千載其揆一

也

體分君臣體統殊也冥固謂默相連屬也風美所扇謂風聲所感動也訓革改易教令也

故二

八升而唐堯盛伊呂用而湯武寧

舜舉八元八愷用之于堯時成湯得

伊尹武王得呂

望而社稷安

三賢進而小白興五臣顯而重耳霸

三賢管仲鮑叔隰朋也小白齊桓公名五臣狐偃趙衰顛頤魏武子司空季子也重耳晉文公名

中

古陵遲斯道替矣居上者不以至公理物為下者必

以私路期榮御圓者不以信誠率眾執方者必以權

謀自顯

上君也下臣也私路謂私行請託以求其榮圓天也謂君方地也謂臣

於是君

臣離而名教薄世多亂而時不治故遽寧以之卷舒

柳下以之三黜接輿以之行歌魯連以之赴海袁世

之中保持名節君臣相體若合符契則燕昭樂毅古

之流也夫未遇伯樂則千載無一驥

言不遇明主則賢人亦無以自

見也時值龍顏則當年控三傑漢之得材於斯為貴

龍顏

漢高也控御也三傑子房蕭何韓信也

高祖雖不以道勝御物羣下得

盡其忠

漢雜伯故云不以道勝

蕭曹雖不以三代事主百姓不

失其業靜亂庇人抑亦其次夫時方顛沛則顯不如

隱萬物思治則默不如語

顛沛謂亂也君子當明哲保身故顯不如隱也萬物

欲得其理必當立教垂制故尚語不尚默也

是以古之君子不患弘道難

遭時難遭時不難遇君難故有道無時孟子所以咨

嗟有時無君賈生所以垂泣夫萬歲一期有生之通

塗千載一遇賢智之嘉會遇之不能無欣喪之何能

無慨古人之言信有情哉余以暇日常覽國志

謂三國志

考其君臣比其行事雖道謝先代亦異世一時也文

若懷獨見之明而有救世之心

魏臣荀彧字文若

論時則民

方塗炭計能則莫出魏武故委面霸朝豫議世事

委質

北面以事魏朝

舉才不以標鑒故久之而後顯

言彧舉賢良不自眩已之

明鑒故久而後顯籌畫不以要功故事至而後定雖亾身明

順識亦高矣

或歿欲匡漢故云明順

董卓之亂神器遷逼

神器帝位

也時卓逼遷獻帝於長安

公達慨然志在致命

荀攸字公達

由斯而談

故以大存名節至如身為漢隸而跡入魏幕

隸官也軍府曰

幕

源流趣舍其亦文若之謂所以存亾殊致始終不

同將以文若既明名教有寄乎

言攸志本在匡漢亦與或同或歿而攸存

所以殊者以或之歿足明臣節既使名教有託則攸可以無歿也

夫仁義不可不明

則時宗舉其致

時宗當時所宗主謂荀或也

生理不可不全故達

識攝其契

攝行也契義也達識謂荀攸也

相與弘道豈不遠哉

言二荀相

與廣此二道豈不深遠哉
道謂明臣義全生理也

崔生高朗折而不撓

崔琰亦魏

臣也所以策名魏武執笏霸朝者蓋以漢主當陽魏后

北面者哉

言琰有高明之志不可屈撓所以事魏者以漢主在上魏武尚北面為臣故也霸朝

謂魏也

若乃一旦進璽君臣易位則崔子所不與魏武

所不容

若乃設言也設使魏若代漢為帝則琰必不從之而魏武亦不能容琰也

夫江湖

所以濟舟亦所以覆舟仁義所以全身亦所以亡身

言以仁義見福也

然而先賢玉摧於前來哲攘袂於後豈非

天懷發中而名教束物者乎

玉摧謂秉義而亡也攘袂謂聞風而起也天懷

發中謂良心感發也名教束物謂禮教範圍也

孔明盤桓俟時而動遐想管

樂

孔明嘗自比管樂

遠明風流治國以禮民無怨聲形罰不

濫沒有餘泣雖古之遺愛何以加茲

左傳子產卒仲尼聞之出涕曰

古之遺愛也

及其臨終顧託受遺作相劉后授之無疑心

武侯處之無懼色繼體納之無貳情

繼體謂後主也

百姓信

之無異辭君臣之際良可詠矣公瑾卓爾逸志不羣

總角料主則素契於伯符

周瑜字公瑾孫策字伯符總角謂童子時也料度也

孫策與瑜同年少嘗友善登堂拜母晚節曜奇則參分於赤壁

晚節謂壯年也

曜奇謂用兵也參分謂成鼎足之勢於赤壁之戰也

惜其齡促志未可量

瑜早卒

子布佐策致延譽之美

張昭字子布

輟哭止哀有翼戴之

功

策薨以事授權權哭張昭謂權曰孝廉此寧哭時耶

神情所涉豈徒蹇愕而

已哉

言所論者大也

然而杜門不用登壇受譏

權以公孫淵稱藩遣張彌

至遼東拜淵為燕王昭諫權不聽昭忿言不用稱疾不朝權恨之土塞其門昭又于內以土封之赤壁之役權請會百官歸功周瑜昭舉笏欲褒贊功德未及言權曰如張公計今已乞食矣昭大慙伏地故云受譏

夫一人之身所照未異而用舍之間俄有不同况

沈跡溝壑遇與不遇者乎

初昭之用也委以內外文武之事及其不用有此譏

辱一人之身好惡不同况沈棄於溝壑遇時與不遇者乎

夫詩頌之作有自來矣

或以吟詠情性或以述德顯功雖大旨同歸所託或

乖若夫出處有道名體不滯風軌德音為世作範不

可廢也故復撰序所懷以為之讚云

序所列魏國人才皆取其為漢

秉義甚得與奪微權

火德既微運纏大過

平聲叶韻火德謂漢大過易卦名猶云季

世也洪飈扇海二溟揚波

洪飈大風也二溟謂南溟北溟也揚波喻亂也

虬虎

雖驚風雲未和

虬龍也言未和者君臣未相應合也

潛魚擇淵高鳥候

柯

言臣之求君也

赫赫三雄竝迴乾軸

赫赫盛貌三雄謂三國之主也乾軸猶云

天道也

競收杞梓爭采松竹鳳不及栖龍不暇伏谷無

幽蘭嶺無亭菊

杞梓松竹龍鳳蘭菊竝喻人才也

英英文若靈鑒洞

照應變知微探頤賞要日月在躬隱之彌曜

言文明也

文

明映心鑽之愈妙

言其情深也

滄海橫流玉石同碎

滄海橫流

言逆達人兼善廢已存愛謀解時紛功濟宇內紛亂也

始救生人終明風槩古代反董昭等謂曹操宜進爵國公九錫備物以彰殊勲密以

咨或或以操本興義兵君子愛人以德不宜如此操軍至濡須或病留壽春操饋或食發之乃空器也於是飲藥而卒風槩節

槩也以上言荀彧也公達潜朗思同著蔡蔡邕也著以筮龜以

卜言思慮潜明有如一筮運用無方動攝羣會爰初發跡邁此顛

沛神情玄定處之彌泰荀攸與議郎何顒等謀殺卓垂就而覺卓收顒攸繫獄何

顒懼自殺攸言語飲食自若會卓死得免動攝羣會謂統攝衆事也邁遇也神情玄定玄遠而有定主也

惛惛幕裏筭無不經惛惛安靜貌幕裏謂軍中也疊疊通韻跡不

暫停雖懷尺璧顧哂連城疊疊有爲也易成天下之疊疊通韻通和而不滯也

懷璧而哂連城之價喻

智能拯物愚足全生

操每稱公達外

懷才抱德而輕爵祿也

愚內智智可及愚不

通而能固恂恂德心汪汪軌度志成弱冠道敷歲暮

仁者必勇德亦有言雖遇履虎神氣恬然

呂奉欲使渙作書罵

辱備以兵脅之渙顏色不變笑曰渙聞唯德可以辱人不聞以罵使彼固君子耶且不耻將軍之言彼誠小人耶將復將軍之意則辱在此不在於彼如一旦去此復罵將軍可乎布慙而止履虎尾喻危懼也言其雖遇危懼之行不修飾名跡無愆操不激切素風時神氣不易也

愈鮮

以上言袁渙也

邈哉崔生體正心直天骨疎朗牆宇高

疑

魚力反天性疎通而明朗若牆宇高不可窺見其內也疑高貌

忠存軌跡義彤風

色思樹芳蘭翦除荆棘人惡其上時不容哲左傳伯宗之妻

曰盜憎主人民惡其上言琅琅先生雅杖名節雖遇

塵霧猶振霜雪杖持也運極道消碎此明月楊訓發表

琰取訓表草視之與訓書訓曰琰此書傲世怨景山

誨操怒遂賜琰死明珠也以上言崔琰也

恢誕韻與道合形器不存方寸海納形器不存不凝

心也海納如海和而不同通而不雜遇醉忘辭在醒

之納百川也

貽答操時禁酒而徐邈私飲至於沈醉校事趙達問

以曹事邈曰中聖人達白操甚怒度遼將軍鮮于輔進曰平日醉客謂酒清者為聖人濁者為賢人邈性循慎偶醉言耳竟坐得刑不踐祚歷潁川典農中郎將軍駕幸許昌問邈曰頗復中聖人不邈對曰昔子反斃於穀陽卿叔父問於飲酒臣者同二子不能

自懲時復中之然宿瘤以醜見傳臣以醉見識
帝大笑顧左右曰名不虛立以上言徐邈也
長文

通雅義格終始思戴元首擬伊同耻
格至也終始不移也元首謂文

帝也擬伊志比伊尹耻
不能致君如堯舜也民未知德懼若在已嘉謀肆

庭讜言盈耳
未知君德是輔臣之過故懼若在已也肆陳也以上言陳羣也玉生雖

麗光不踰把德積雖微道映天下
言玉雖麗而光不遠德雖微而輝則

長淵哉泰初字量高雅器範自然標準無假全身由

直跡洿
鳥必偽處歾匪難理存則易
器量法度出於自然爲人標準

無所假借也人之立身皆欲正道及至履跡濁世必
從虛僞玄終始不變身臨誅戮辭色自若可見處歾
非難惟正直之理存焉歾
則易矣以上言夏侯玄也
萬物波蕩孰任其累六合

徒廣容身靡寄

萬物波蕩謂天下亂如波浪之沸也孰任其累謂誰堪其敗言人共苦之

也君親自然匪由名教敬愛既同情禮兼到

君親本於天性

非由名教使然烈烈王生知歿不撓求仁不遠期在忠孝

魏帝

見威權日去不勝其忿乃召侍中王沉尚書王經散騎常侍王素謂曰司馬昭之心路人所知也吾不能坐受廢辱今日當與卿自出討之沉業馳告經侍帝不出遂被殺以上言王經也玄伯剛簡

大存名體志在高構增堂及陛

堂陛喻君臣也言泰志在尊君使有等差

端委虎門正言彌啟臨危致命盡其心禮

虎門軍門也言其端

身委質於虎門之下正直之言益開也高貴鄉公之弑司馬昭會朝臣議泰垂涕入昭待之曲室謂曰玄伯卿何以處我對曰誅賈克以謝天下昭乃曰為吾更思其次泰言唯有進於此不知其次以上言陳泰

也自荀彧至此竝魏臣
堂堂孔明基宇宏邈器同生民獨稟先

覺標榜風流遠明管樂初九龍盤雅志彌確周易初九潛龍

勿用百六道喪干戈迭用易傳謂陽九之厄百六之會蓋一百六歲曰陽九之厄言

漢道喪亂遭此厄也苟非命世孰掃雰雰天氣下地氣不應曰雰雰陰氣也武功切

今叶韻音夢宗子思寧薄言解控劉備漢中山靖王後故曰宗子解控謂有急而

控告於已釋褐中林鬱為時棟釋去也褐庶人之服言去褐衣棄林野鬱

已能解之然而起為棟梁之臣士元弘長雅性內融崇善愛物

也以上言諸葛亮也觀始知終喪亂備矣勝塗未隆先生標之振起清風

言天下喪亂多時而勝殘之道未有盛者統之為政乃振古風綢繆哲后無妄惟時

綢繆猶纏綿也哲后謂先主也无妄惟時言當窮時也易无妄辭云无妄之性窮之災也夙夜匪

懈義在緝熙三略既陳霸業已基

劉璋既還成都先主嘗為璋北征漢

中統說曰陰選精兵晝夜兼道徑襲成都璋素無備大軍卒至一舉便定此上計也楊懷高沛璋之名將各仗強兵據守關頭聞數有牋諫璋使發遣將軍還荆州將軍未去遣與相聞說荆州有急欲還救之並使裝束外作歸形此二子既服將軍英名又喜將軍之去必乘輕騎來見將軍因此執之進取其兵乃向成都此中計也退還白帝連引荆州徐還圖之此下計也若沈吟不去將致大困不可以久矣先主然其中計即斬懷沛還向成都所過輒克故云三略基霸以上言龐統也公琰植根不忘中

正豈曰摸擬實在雅性亦既羈勒負荷時命推賢恭

已久而可敬

羈馬絡頭也勒控也言琰既受祿秩以為驅策如良馬之有絡控以上言蔣琬

也公衡冲達秉心淵塞媚茲一人臨難不惑冲和也秉執也

淵深也塞實也媚愛也一人天子也疇昔不造假翮鄰國不造謂伐吳軍敗也假翮

鄰國謂降魏也進能徽音退不失德魏文帝謂權曰君舍逆效順欲追蹤陳韓耶權

對曰臣過受劉氏殊遇降吳不可還蜀無路是以歸命先主薨問至魏羣臣咸賀權獨否以上言黃權也

自諸葛亮至此並蜀臣六合紛紜民心將變鳥擇高梧臣須顧

眄紛紜亂也公瑾英達朗心獨見披草求君定交一面披草

即披草萊之意君謂孫策也桓桓魏武外託霸跡志掩衡霍恃戰

忘敵先述魏武欲明周瑜赤壁功也衡霍吳二山名卓卓若人曜奇赤壁三

光參分宇宙暫隔若人猶此人言瑜也三光謂日月星參分者言三國也隔謂各據一

方以上言

周瑜也

子布擅名遭世方擾撫翼桑梓息肩江表

撫猶歛也言其如鳥歛翼於

鄉閭避難江東遂投孫策也

王略威夷吳魏同寶遂

贊宏謨匡此霸道

略道也威夷險阻也吳魏先同起兵以平天下故云同寶也贊助也

宏大也霸

道謂吳也

桓王之薨大業未純把臂託孤惟賢與親

孫權即位追諡孫策為長沙桓王言策薨

時帝業未安而策把臂託昭以為後也

輟哭止哀

臨難忘身成此南面實由老臣

張昭謂權曰昔太后桓王不以老臣屬陛下

下而以陛下屬老

臣以上言張昭也

才為世出世亦須才得而能任貴

在無猜昂昂子敬拔跡草萊荷擔吐奇乃構雲臺

昂昂

出羣貌荷擔賤者之事雲臺言功高也以上言魯肅也

子瑜都長體性純懿諫

而不犯正而不毅

都美也長厚也

將命公庭退忘私位豈無

鵲鵲固慎名器

建安二十年權遣瑾通好於蜀瑾與弟亮俱公會相見無私面云鵲鵲兄

弟也以上言

伯言蹇蹇以道佐世出能勤功入能獻

諸葛瑾也

替

出為將帥勤事而有功入則獻可而替否獻進也替廢也

謀寧社稷解紛挫銳

正以招疑忠而獲戾

吳太子有不安之議遜上疏陳太子正統宜有盤石之固魯王

藩臣當使寵秩有差彼此得所上下獲安書三四上太傅吳粲坐數與遜交書下獄歿權累遣中使責讓

遜遜憤恚卒以上言陸遜也

元歎穆遠神和形檢如彼白珪質無

塵玷

檢整也言其志思美遠神理清和形貌嚴整如珪玉無玷缺也

立行以恒匡上

以漸

以恒言有常也以漸言不驟也

清不增潔濁不加染

謂心清無所加其潔

時濁不能染其素
以上言顧雍也

仲翔貞亮性不和物

亮明也不和物謂不隨俗

好是不群折而不屈屢摧逆鱗直道受黜歎過孫陽

放同賈屈

性不容非故曰好是不羣志多正直故曰折而不屈龍喉下有逆鱗嬰之即次喻人

主之怒也屢摧逆鱗謂犯顏直諫也歎過孫陽言如良馬不見知也賈屈賈誼屈原也以上言虞翻也自

周瑜至此

詵詵衆賢千載一遇

此總述也詵詵衆美也

整轡高

衢驤首天路

驤舉也

仰挹玄流俯弘時務

玄天也玄流君澤也

名

節殊途雅致同趣日月麗天瞻之不墜仁義在躬用

之不匱尚想遐風載挹載味後生擊節懦夫增氣

殊途

同趣跡異而理同也日月不墜與仁義之用不匱也餘光遺韻足以收後立懦正所謂不匱也

符命

○封禪文

封泰山禪梁父築土為壇因高事天告王者之功成銘於金石以示後代也長

卿病甚武帝使所忠往求其書及至已卒其妻曰長卿未死時為一卷書曰有使來求書奏之其遺札言封禪事也昔史魚以尸諫而長卿乃以佞辭逢君若寵身後邵雍詩云猶喜曾無封禪書寓意深矣

司馬相如

伊上古之初肇自顓穹之生民

伊發語辭也肇始也顓穹天也顓氣顓汗

也穹形穹窿也言始有天地以來也

歷選列辟以迄於秦

選數也辟君也迄至也

率邇者踵武聽述者風聲

近者踵其跡遠者聽其聲述遠也

紛綸葳蕤

蕤湮滅而不稱者不可勝數

紛綸葳蕤言衆多也其湮沒磨滅不稱於載籍

者不可勝計繼昭夏崇號諡略可道者七十有二君昭明也夏

大也自古之君有繼明大道崇其號諡歷世可稱道者七十二君而已罔若淑而不昌

疇逆失而能存若順也淑善也疇誰也言為君之道無順美而不昌盛者無逆失而能長

存者軒轅之前遐哉邈乎其詳不可得聞已五三六經

載籍之傳維風可觀也五帝三王之道六經典籍之所傳述流風亦可見也維語

辭也書曰元首明哉股肱良哉因斯以談君莫盛於唐

堯臣莫賢於后稷后稷創業於唐后稷唐臣周之始祖公劉發

跡於西戎公劉后稷曾孫居于西戎人咸歸之文王改制爰周邳質隆

大行越成而後陵遲衰微千載亡聲豈不善始善終

哉

邳至也行道也越于也文王始開王業改易制度大通之道於是乎成故雖後嗣衰替猶經二載而

無惡聲是善

然無異端慎所由於前謹遺教於後耳

始而善終也

異端猶云他術也言周更無他

故軌跡夷易易遵也

術但創業定制垂裕後昆耳

夷易平易也言周之

湛恩厯鴻易豐也

湛深也音沈厯鴻皆大也

治迹平易易遵奉也

厯莫

憲度著明易則也垂統理順易繼也是以業隆

江切

於襁褓而崇冠於二后揆厥所元終都攸卒未有殊

尤絕跡可考於今者也

襁褓謂成王也二后謂文武也元始也都令也卒即卒業

之卒尤異也言成王之業高於文武考其所始亦令終矣然無異跡可考見於今也

然猶躡梁

父登泰山建顯號施尊名大漢之德逢湧原泉沕

勿

湔

曼羨

逢遇也喻其德盛若遇原泉之湧出也湧沒也湔泉貌曼羨散漫也

旁鳧四

塞雲布霧散

旁鳧布衍也鳧音薄言德澤通達於四方如雲霧布散無所不至也

上暢

九垓下泝八埏

暢達也垓重也泝流也言聖化上達九重下流八極

懷生之類

霑濡浸潤

懷生氣之類皆被恩澤

協氣橫流武節森逝

協氣和氣也橫

流多也森疾風也

邇陞游原遐澗泳沫

泳浮也以恩德比之於水則近者游其原

遠者浮其沫

首惡鬱沒晻昧昭晰

鬱沒湮滅也晻昧晦冥也

昆蟲闔澤

回首面內

闔澤猶云望恩也面向也

然後囿騶虞之珍羣徼麋鹿

之惟獸

騶虞義獸有至信則應徼遮也

導一莖六穗於庖犧雙觝共

抵之獸

一莖六穗謂嘉禾犧牲也觝角也抵本也武帝獲白鱗角共一本以為牲言取嘉禾以充

庖廚用麒麟以供祭祀也

獲周餘放龜於岐

周放畜餘龜於池中至漢得之於岐山之

旁龜能吐故納新千歲不灰

招翠黃乘龍於沼

翠黃乘黃也龍翼馬身黃帝乘之而

仙言見乘黃而招呼之也

鬼神接靈圉賓於間館

是時

淫注水中出神馬故云沼

上求神仙得上郡之巫長陵女子能與鬼神交接療病輒愈置於上林苑中號曰神君似古靈圉禮待之

於間館中

奇物譎詭倣儻窮變

倣黨卓異也奇偉之物譎詭非常卓然絕異窮極事

變欽哉符瑞臻茲猶以為德薄不敢道封禪

言武帝敬爾眾

瑞至此尚謙德薄不敢述封禪之事

蓋周躍魚隕航休之以燎

白魚人舟武王

取以祭也微夫此之為符也以登介丘不亦慝

女

乎進讓

之道何其爽歟

介猶大也言周以白魚為瑞登泰山封禪不以足乎小雅心慙曰慝進周

也讓漢也爽差也言周末可封禪為進漢可封禪而不封為讓於是大司馬進曰陛

下仁育羣生義征不諛

音惠大司馬上公也相如諸假立之以發後辭讓順也

夏樂貢百蠻執贄德侔往初功無與二

往初古昔也

休烈

浹洽符瑞衆變期應紹至不特創見

言盛德徧天下符瑞應期繼至

不獨初見而已也

意泰山梁父設壇場望幸蓋號以况榮

意想

夫泰山梁父設壇場望帝封禪紀號以表榮名也望幸望帝之臨幸也蓋者發語之辭

上帝垂

恩儲祉將以慶成

上帝天也儲待也祉福也慶善也

陛下謙讓而弗

發聳三神之歡缺王道之儀

聳絕也三神上帝泰山梁父也此言不封禪為

缺羣臣慝焉或曰且天為質闇示珍符固不可辭

天

隱而難窺故曰閻珍符祥瑞也若然辭之是泰山靡記而梁父罔幾

也泰山之上無所表記亦各並時而榮咸濟厥世而

屈說者尚何稱於後而云七十二君哉言古之時猶今時也乃封

禪而泰山梁父與有榮焉今之世猶前世也此典屈而不舉後世何所稱述哉夫修德以錫

符奉命以行事不為進越也言天子修德則天賜以瑞應天子乃奉瑞應以

行封禪之事不為踰禮故聖王不替而修禮地祇謁款天神勒

功中嶽謁告也款誠也言帝王之德不廢則修禮地祇告誠天神也凡有事泰山必先禮中嶽故

云勒功中嶽以章至尊舒盛德發號榮受厚福以浸黎元

章明也浸潤也皇皇哉此天下之壯觀王者之卒業

黎元百姓也

不可貶也願陛下全之而後因雜指紳先生之略術

使獲耀日月之末光絕炎以展宏錯事

皇皇盛也卒終也貶損也

雜采也術略智術才略也未光絕炎猶云餘輝也錯措也展宏錯事展其官職而措諸事業也猶兼

正列其義被

夫

飾厥文作春秋一藝將襲舊六為七

攄之無窮

春秋者正天時別力事諸儒既得展事業因欲被飾文辭作述一經將繼舊六經以

為七經行之於無窮謂漢應使諸儒著書也襲因也

俾萬世得激清流揚微波

蜚英聲騰茂實

蜚古飛字騰播也

前聖所以永保鴻名而常

為稱首者用此宏命掌故悉奏其儀而覽焉

掌故謂掌禮樂

之故

於是天子沛然改容曰俞乎朕其試哉乃遷思

事者

迴慮總公卿之議詢封禪之事詩大澤之博廣符瑞

之富

詩歌詠功德下四章之頌也大澤之博謂自我天覆雲之油油廣博也符瑞之富謂班班之獸

以下三章言符應之富饒也

遂作頌曰

自我天覆雲之油油

天子之德如天覆萬物雲行天下也

甘露時雨厥

壤可游

壤土也游作也謂風雨時可行其農作也

滋液滲

疏

漉

鹿

何生不

育

滲下漉也漉水下貌雨露滋液潤澤滲下於土何物之生者不養也

嘉穀六穗我穡

曷蓄

言我之稼穡既豐何所不蓄積也曷何也

非唯雨之又潤澤之非唯

徧之我汜

似

布護之

非唯徧我下人而已蓋治化分散萬物皆霑也

萬物熙

熙懷而慕思名山顯位望君之來

名山泰山也言此山神之位望天子

之來

君乎君乎侯不邁哉

侯何也言君何不行邁也

般般之獸樂

我君圖白質黑章其儀可嘉

謂騶虞也騶虞似虎而斑文般般雜色樂遊也

眈眈

是

穆穆君子之態蓋聞其聲今親其來

去聲叶韻眈眈

和也穆穆敬也言容態和且敬有似君子也蓋曾聞之今乃親見也

厥塗靡從天瑞之

徵

其道何由此乃天瑞之應

茲亦於舜虞氏以興

百獸率舞則濯

濯之麟游彼靈時孟冬十月君徂郊祀馳我君與帝

用享社

武帝元狩元年十月往五時祭祀有白麟見馳於帝車之側此乃上帝享君福也徂往也

三代之前蓋未嘗有宛宛黃龍興德而升

時有黃龍見也宛宛

龍貌

采色炫燿煥炳輝煌正陽顯見覺悟黎蒸於傳載

之云受命所乘

陽龍也言龍見乃覺悟下人知天子之德又於書傳所載黃龍土德也漢

本火今黃龍見當改爲土故云受命所乘

厥之有章不必諄諄

天之符瑞章明不必

諄諄然有言

依類託寓喻以封巒

言依祥瑞之類託寓其意默喻以封山之巒

山也

披藝觀之天人之際已交上下相發允答聖王之

德競競翼翼

披藝披覽藝文也上下即天人也言聖王以敬德動天故天心允答其德此其

所以宜於封禪

故曰於

音鳥歎美之辭

興必慮衰安必思危是以湯

武至尊嚴不失肅祗舜在假

格

典顧省闕遺此之謂

也

假大也興必慮衰以下言競競翼翼也末語雖寓規諷終是勸百誠一

○劇秦美新

并序楊雄論秦之劇稱新之美此乃計其勝負比其優劣之義劇言暴甚

也王莽定有天下之號曰新是時雄仕莽朝故著此文以悅莽通篇若參天貳地上帝后土玄符黃瑞天剖地合天祭地事皇穹下士天衢地釐何爰天地之煩也辭得無游且屈乎不知何以入選

楊雄

諸吏中散大夫臣雄稽首再拜上封事皇帝陛下

謂莽

也

臣雄經術淺薄行能無異數蒙渥恩拔擢倫比與

羣賢竝愧無以稱職臣伏惟陛下以至聖之德龍興登庸欽明尚古作民父母爲天下主執粹清之道鏡

照四海聽聆風俗博覽廣包參天貳地兼竝神明配

五帝冠三王開闢以來未之聞也臣誠樂昭著新德

光之罔極樂昭新德喜頌莽也往時司馬相如作封禪一篇以

彰漢氏之休臣常有顛胸病恐一旦先犬馬填溝壑

胸與眩古字通顛胸謂風疾也所懷不章長恨黃泉敢竭肝膽寫腹

心作劇秦美新一篇雖未究萬分之一亦臣之極思

也効尤相如殆又甚焉可謂其父殺人報仇其子必且行劫臣雄稽首再拜以聞

曰

權輿天地未始許惟肝肝言混沌之始天地未開萬物不定也權輿始也

祛開也雖雖
肝肝不分貌

或玄而萌或黃而牙

言天地方開故玄
黃異色而生萌芽

也

玄黃剖判上下相嘔

天地既判故相與嘔
養萬物也嘔與煦同

爰初生

民帝王始存在乎混混茫茫之時豐聞罕漫而不昭

察世莫得而云也

豐聞罕漫
不明之貌

厥有云者上罔顯於義

皇

罔無也
顯明也

中莫盛於唐虞邇靡著於成周

邇近也靡
無也著昭

著

仲尼不遭用春秋因斯發

孔子不見用於
時故修春秋

言神明

所祚兆民所託罔不云道德仁義禮智獨秦崛起西

戎邠荒岐雍之疆

邠岐雍皆地名
荒外也疆界也

因襄文宣靈之僭

跡

襄文宣靈並秦公謚也
言始皇因此跡而起

立基孝公茂惠文奮昭莊

孝公惠文昭莊並秦王諡也茂盛也奮起也言秦之盛從此而起

至政破從擅衡并

吞六國遂稱乎始皇盛從鞅儀韋斯之邪政

政始皇名政初

并天下號始皇帝盛從之從讀如字言其任用商鞅張儀呂不韋李斯也

馳驚起翦恬賁

奔之用兵

白起攻楚拔鄢郢王翦攻趙

剗楚滅古文

刮語燒書

剗削也刮除也言除百家之言

弛禮崩樂塗民耳目

塗塞也欲

使人愚也

遂欲流唐漂虞滌殷蕩周

流漂滌蕩謂除之也

難除仲尼

之篇籍自勒功業

難古然字即燒也勒記也

改制度軌量咸稽之

於秦紀

稽考也紀本紀也言考校而著之秦紀

是以耆儒碩老抱其書

而遠遜

耆舊也碩大也遜逃也

禮官博士卷其舌而不談來儀

之鳥肉角之獸狙

七余獷猛

而不臻

來儀鳳也肉角麟也鳳凰麒麟皆以

秦如惡狗而不至也狙獷犬齧人者

甘露嘉醴景曜浸潭之瑞潛

嘉醴醴泉

也景曜景星也浸潭謂滋液浸潤能生萬物也潛藏也

大第經實

隕

巨狄鬼信

之妖發

第彗星也步忽切始皇本紀彗星光見東方北方始皇有大人身長五丈謂之巨狄鬼信

謂告祖龍歿也

神歇靈繹海水羣飛二世而亾何其劇與

天

神祇以秦無道之甚故歇其靈潤滋液不降福祥海水羣飛喻大亂也

帝王之道競競

乎不可離已夫能貞而明之者窮祥瑞回而昧之者

極妖愆

貞正也言既貞且明故祥瑞咸格回邪也既邪且闇故妖愆競集

上覽古在

昔有憑應而尚缺焉壞徹而能全

言古帝王之興有憑依瑞應而尚毀

缺者豈有行壞徹之道而全立乎徹猶廢也

故若古者稱堯舜威侮者陷

桀紂

若順也

況盡汎

音信

掃前聖數千載功業專用已之

私而能享祐者哉

言除掃前聖之書專用已之私以爲酷暴安能享福久遠乎汎除也

會漢祖龍騰豐沛奮迅宛葉

音攝宛葉地名

自武關與項羽

戮力咸陽創業蜀漢發跡三秦克項山東而帝天下

擿秦政慘酷尤煩者應時而蠲

沛公召秦豪傑曰父老苦秦苛法久矣與

父老約法三章悉除秦法蠲除也

如儒林刑辟歷紀圖典之用稍增

焉

辟法也言始開學校定刑法也歷紀謂歷代之紀及圖書經典稍益焉

秦餘制度項

氏爵號雖違古而猶襲之

雖知其違古猶因之未盡除也

是以帝典

闕而不補王綱弛而未張道極數殫闇忽不還

言天道既

極曆數又殫故闇忽而滅不能自還

逮至大新受命上帝還資后土顧

懷

自大新以下皆美新也言上帝迴還而資之后土顧眷而懷之

玄符靈契黃瑞涌

出

玄天也黃地也言天地符契祥瑞皆見

渾淳沕滴

音必勃勿聿皆水流貌

川流

海淳雲動風偃霧集雨散誕彌八圻上陳天庭

八圻猶八

挺以上皆言祥瑞之多也

震聲日景炎光飛響盈塞天淵之間必

有不可辭讓云爾

言威聲如雷光景若日塞乎天淵無所不至也

於是乃奉

若天命窮寵極崇

窮寵極崇謂居尊也

與天剖神符地合靈契

創億兆規萬世

分天之符合地之契言應錄而王也創億兆大也規萬世久也

奇偉

倜儻譎詭天祭地事

倜儻謂卓異也譎詭謂變化之速言衆瑞所以咸臻者由能祭

天事地也

其異物殊恠存乎五威將帥班乎天下者四十

有八章

莽遣五威將軍王奇等班符命四十八篇於天下

登假皇穹鋪衍下

土非新室其疇離之

假至也言衆瑞上升於皇天鋪衍於下土離麗也

卓哉

煌煌真天子之表也

表儀也

若夫白鳩丹鳥素魚斷蛇

方斯蔑矣

湯有白鳩丹鳥之瑞武王有白魚之祥高祖有斬白蛇之應比之於此不能及也

受命甚易格來甚勤

言莽德盛故受天命甚易而衆瑞之至者甚勤也

昔帝

纘皇王纘帝隨前踵古或無爲而治或損益而亾豈

知新室委心積意儲思垂務

纘繼也踵追也

旁作穆穆明且

不寐勤勤懇懇者非秦之為與

言新室所以勤懇者以秦之所為為非也

夫不勤勤則前人不當不懇懇則覺德不愷

不當者不能當

先王之意也毛詩不覺德行愷和也

是以發祕府覽書林遙集乎文雅

之囿翱翔乎禮樂之場胤殷周之失業紹唐虞之絕

風

言以文雅為園囿以禮樂為場圃胤續也紹繼也

懿律嘉量金科玉條神

卦靈兆古文畢發煥炳照耀靡不宜臻

律六律也量斗斛也金科

王條謂法令也言金玉侯辭也著曰卦龜曰兆神式靈尊之也古文先王之典籍也宜徧也臻至也

軫軒旂旗以示之

式用也軫如今牕車也車服有差以示百官之等級

揚和鸞

肆夏以節之

鸞和皆金鈴也揚動也和鸞金鈴以節車行也肆夏樂名步則歌之以中節

施黼黻衮冕以昭之正嫁娶送終以尊之親九族淑

賢以穆之

穆和也

夫改定神祇上儀也

改定祭神祇之禮

欽脩

百祀咸秩也

謂敬修百祀皆得次序

明堂雍臺壯觀也九廟長

壽極孝也

天子七廟莽加黃帝虞舜二廟是為九廟矣又置長壽宮以為文母養食之堂

制

成六經洪業也

經有五而又立樂故云六經

北懷單于廣德也若

復五爵度三壤

尚書列爵惟五分土惟三

經井田免人役

莽令更名天下

奴婢曰私屬皆不得賣之

方甫刑

方比也甫刑尚書篇名言制刑法以比之

匡馬法

匡正

也司馬法兵革之事也

恢崇祗庸燦德懿和之風

恢大也祇敬也庸用也燦

盛也懿美也

廣彼搢紳講習言諫箴誦之塗

搢紳儒生也言廣用儒生

講習經義以開箴規諷誦之路也

振鷺之聲充庭鴻鸞之黨漸階

毛詩

振鷺易鴻漸皆喻賢人也充庭漸階言多也漸進也

俾前聖之緒布濩流衍而

不韞櫝

緒業也布濩分散貌衍廣也韞櫝藏也

郁郁乎煥哉天人之事

盛矣鬼神之望允塞羣公先正罔不夷儀

尚書羣公既皆聽命

又亦惟先王夷儀言有常儀也

姦宄寇賊罔不振威紹少典之苗著

黃虞之裔

莽以少典黃帝虞舜為先祖少典黃帝父也

帝典闕者已補王

綱弛者已張炳炳麟麟豈不懿哉

麟麟光明也麟古麟字

厥被

風濡化者京師沈潛甸內而洽侯衛厲揭要荒濯沐

而術前典巡四民迄四嶽增封泰山禪梁父斯受命

者之典業也

甸內近都者市洽被霑潤也侯衛諸侯也要荒遠服也屬深也揭淺也皆霑也

濯沐微霑也近者深遠者漸淺也術法也四民士農工商也迄至也言法前代帝王之典禮巡省四方至

於四嶽申宗祀之儀也典常也

言封禪之事王者之常業也蓋受命日不暇給或

不受命然猶有事矣

言高祖受命而不暇封禪始皇不受命猶有事乎泰山也况

堂堂有新正丁厥時崇嶽渟海通瀆之神咸設壇場

望受命之臻焉

言莽既受命故岳瀆之神皆設壇場而望來祭也堂堂盛也丁當也海

外選方信延頸企踵回面內嚮喁喁如也

企舉也四面內向謂

順服也喁喁

眾口喜悅貌

帝者雖勤惡可以已乎

帝謂莽也已止也言天下傾心

雖欲勤為辭讓不事封禪可以止乎

宜命賢哲作帝典一篇奮三為一

襲以示來人摛之罔極

奮起也襲藏也一令一也言宜命賢智作帝典一篇起堯

舜二典合而成三藏以示後也

令萬世常戴巍巍履栗栗

令萬世之後常荷高

大之德履敬謹之道也栗栗敬也

臭馨香含甘實鏡純粹之至精聆

清和之正聲

鏡鑒也聆聽也

則百工伊凝庶績咸喜荷天衢

提地釐

天下之士皆欣荷天道之亨通統其地理以助君之安人也地為臣道提統也釐理也

斯天下之上則已庶可試哉

上則高法也試試為之也

漢天子之山川道里所經

此其所以為天下之要也

故聖王之治天下必先定其

疆域然後分其土

以居之

是以聖王入居之

○典引

并序典者常法也引者伸也尚書疏堯之常法謂之堯典漢紹其緒引而伸之故曰

典引

班固

臣固言永平十七年臣與賈逵傅毅杜矩展隆郗萌等召詣雲龍門小黃門趙宣持秦始皇帝本紀問臣等曰太史遷下贊語中寧有非耶

太史司馬遷也

臣對此贊

賈誼過秦篇云向使子嬰有庸主之才僅得中佐秦之社稷未宜絕也此言非是

史記始皇贊中全述賈誼語而班固則以誼所

言者為非

即召臣入問本聞此論非耶將見問意開寤耶

臣具對素聞知狀本所聞知詔因曰司馬遷著書成一家

言揚名後世至以身陷刑之故反微文刺譏貶損當

世非誼士也陷刑論遷坐宮刑也微文譏刺作隱語也司馬相如洿行無

節謂私卓氏女但有浮華之詞不周於用周備也至於疾病

而遺忠主土求取其書竟得頌述功德言封禪事忠

臣效也至是賢遷遠矣固言相如之封禪文為忠而賢於遷大是偏頗臣固

常伏刻誦聖論昭明好惡不遺微細緣事斷誼動有

規矩雖仲尼之因史見意亦無以加因史見意謂修春秋示褒貶

臣固被學最舊受恩浸深誠思畢力竭情昊天罔極

被學謂為學官也最舊言久也浸漸也畢盡也言報天子之恩如天之無極

臣固頓首頓

首伏惟相如封禪靡而不典楊雄美新典而無實然

皆游揚後世垂為舊式臣固才朽不及前人蓋詠雲

門者難為音觀隨和者難為珍不勝區區竊作典引

一篇雖不足雍容明盛萬分之一猶啟發憤懣覺悟

童蒙光揚大漢軼聲前代

軼過也言光揚大漢之美聲過於前世也

然後

退入溝壑歿而不朽臣固愚戇頓首頓首曰

太極之元兩儀始分烟烟

因

熅熅

烟熅陰陽和貌

有沈而奧

有浮而清

奧濁也言兩儀始分之時其氣同沈而濁者為地浮而清者為天

沈浮交

錯庶類混成

地體沈而氣升天道浮而氣降升降交錯則衆類以之而成

肇命民

主五德初起

民主者天子也五德五行之德自伏羲已下帝王相代各據其一行始於木終

於水終而復始

同於草昧玄混之中

易曰天造草昧混猶溷濁

踰繩越契

寂寥而亾

無

詔者系不得而綴也

言結繩書契已往其道寂寞無聲莫

能相告故易系不得綴連也詔言也

厥有氏號紹天闡繹莫不開元於

太昊皇初之首上哉夔乎其書猶得而修也

其有名氏號令

之君繼天開治者莫不始於太昊以為帝王之首上古遠乎其書尚可得修也闡開也繹治也夔遠也

亞斯之代通變神化函光而未曜若夫上稽乾則降

承龍翼而炳諸典謨以冠德卓絕者莫崇乎陶唐

言上

考天道下承龍飛明著於典謨以爲百王之首者莫崇於堯

陶唐含胤而禪有虞

有虞亦命夏后稷契熙載越成湯武股肱既周天迴

歸功元首將授漢劉

天有五行之序堯與四臣各據其一行歷虞夏商周四臣已編

乃歸功元首之子孫故授漢漢爲堯後元首謂堯也胤卽子也

俾其承三季之荒末

值亢龍之災孽懸象闇而恒文垂彝倫敦而舊章缺

三季謂夏殷周之末言使漢承三代荒亂之末值亢龍悔窮之災日月暗昧星辰乖錯常理敗壞古書虧缺聖教喪矣而漢能修之也故先命玄聖使綴學立制

玄聖孔子也

宏

亮洪業表相祖宗贊揚廸詰

言大舉洪業立助祖宗贊揚前古以蹈聖哲之

跡備哉粲爛真神明之式也雖臯夔衡日密勿之輔

比茲褊矣

茲孔子也密勿僈俛也褊小也言古道之興皆由孔子神明之法式雖皋陶與夔及

阿衡周公之輔較之於孔子亦云小矣

是以高光二聖宸居其域

言高祖光

武如北辰居其所而衆星共之

時至氣動乃龍見淵躍

天命既至則候時而動其

出也如龍潛而見遂躍於淵

拊翼而未舉則威靈紛紜

拊翼未舉欲飛也

海內雲蒸雷動電燿

必搖反燿飛也

胡縊莽分尚不涖其誅

分身首相離也涖治也高光未至胡亥王莽皆先已誅不待二祖至而後治其罪也

然後欽若

上下恭揖羣后正位度宗

度居也宗尊也言二祖既除亂諸侯推而尊之然後

敬順天地恭揖諸侯正位居尊也

有于德不台淵穆之讓

淵穆深美之辭尚書

舜讓于德不嗣古文台爲嗣二祖既除暴亂諸侯推尊乃讓於有德自謙不能嗣古帝王此深美之讓也

靡號師矢敦奮撫之容

矢陳也敦勉也言漢取天下無名號師衆陳兵詰誓勸勞

蓋以威德自定也撫與麾同

蓋以膺當天之正統受克讓之歸運

蓄炎上之烈精蘊孔佐之弘陳云爾

火漢德也火曰炎上孔佐即孔

子也能表相祖宗故曰佐弘陳所陳列之大道也

洋洋乎若德帝者之上儀

詰誓所不及已

詰誓謂尚書也言漢帝之儀則尚書所載亦不及也

鋪觀二代

洪纖之度其願可採也

鋪布也言布觀殷周二代大小之度亦有可以採其蹟者

洪大也纖細也蹟多也

竝開迹於一簣同受侯甸之服奕世勤

民以方伯統牧

湯文肇基於小邦如起一簣之土本同列國爲諸侯奕世勤勞以撫下人

乃爲方伯始統率列國也侯甸諸侯之國也

乘其命賜彤弧黃鉞之威用

討韋顧黎崇之不恪

乘因也言因其命賜以彤弓黃鉞乃始征伐也韋顧夏諸侯黎

崇殷諸侯也成湯文王誅之毛詩曰韋顧既伐又曰既伐于崇作邑于豐書曰西伯既勘黎

至于

參伍華夏京遷鎬亳

參伍酌量也言殷周酌華夏之中定為京都乃始遷於鎬亳

遂自北面虎螭其師革滅天邑

湯武自北面臣位用虎螭之兵攻滅桀紂

以升天子位也革改也天邑天子之邑也

是故誼士華而不敦武稱未盡

護有慙德不其然與

湯以臣伐君故古今義士雖以為華美而終非忠厚之道武周

樂也護殷樂也孔子謂武盡美矣未盡善也延陵季子聘魯觀樂見舞大護者曰聖人之弘也而猶有慙

德耻於始伐也豈不然乎

亦猶於穆猗那翕純嘽繹

此商頌周頌美殷周用樂

於宗廟之中也於穆猗那皆美也翕純嘽繹孔子論樂之辭也

以崇嚴祖考殷薦宗

配帝

周易先王以作樂崇德殷薦之上帝以配祖考

發祥流慶對越天地者

焉奕乎千載登不克自神明哉

鳥奕光曜流行貌言二代以臣伐君尚能

作樂配天

誕略有常審言行於篇籍光藻朗而不渝耳

二代

神明其道大略有常但審言行於篇籍能光明而不渝變耳無殊績也

矧夫赫赫聖漢

巍巍唐基泝測其源乃先孕虞育夏甄殷陶周

矧况也泝

上也况我大漢以堯為基上考其源流乃孕育舜禹而成範殷周也蓋舜禹堯臣契湯之祖稷周之祖亦堯臣也故如孕而生之育而長之甄陶而成之甄謂以土燒器也然後宣二祖之重

光襲四宗之緝熙

襲因也高祖光武為二祖考文曰太宗孝武曰世宗孝宣曰中宗孝

明曰顯宗

神靈日照光被六幽

六幽謂天地四方幽遠之處

仁風翔乎

海表威靈行乎鬼區

鬼區卽鬼方也

慝亡

無

回而不泯微胡

瑣而不顧

慝惡也回邪也瑣細也顧養也言邪惡者無不絕而殺之微細者無不安而養之也

故夫顯定三才昭登之績匪堯不興

昭明也登成也言定三才明成

之功非堯不能興也

鋪聞遺策在下之訓匪漢不弘厥道

方漢旁求

博采故有策遺於下者皆遍聞之以立訓焉

至于經緯乾坤出入三光

言使

日月星辰出以其節入以其期而亡朐朐側匿盈縮之類是也

外運渾元內霑毫芒

渾元造化之氣毫芒物之微細言巨細咸被也

性類循理品物咸亨其已久

矣

性生也言物得所已久

盛哉皇家帝世德臣列辟功君百王

榮鏡宇宙尊亡與亢

言漢之德能臣古之列辟其功爲百王之君榮名光照於宇宙

自古帝王無與亢也乃始虔虔敬也鞫鞫固也兢言其有此威德業業貶成抑定不敢

論制作虔敬也鞫固也言其有此威德乃猶敬謹勞謙戒慎自貶其成功自抑其安定不敢論制

作封禪之事至於遷正黜色賓監之事渙揚寓內而禮官

儒林純用篤誨之士不傳祖宗之髣髴雖云優慎無

乃蕙與遷正改正朔也黜色易服色也賓監謂光武封殷後曰紹嘉公周後曰承休公以賓禮之

惟此宣揚於天下也監即周監于二代之監言禮官既不能傳述帝道幾于慎而無禮也於是三

事岳牧之寮僉爾而進曰三公岳牧之官皆欲進言於帝也三事三公也寮官

也僉皆也陛下仰監唐典中述祖則俯蹈宗軌世宗武帝封禪之軌

則也躬奉天經孝者天之經言天子身行孝道也惇睦辨章之化洽尚書

悼敘九族九族既睦平
章百姓辨古平字也
巡靖黎蒸懷保鰥寡之惠浹

巡靖巡狩
而安之也
燔瘞懸沈肅祇羣神之禮備
祭天曰燔柴祭地曰瘞埋

祭山曰庋懸祭川曰
浮沉肅祇皆敬也
是以來儀集羽族於觀魏
來儀鳳也

言感天子之德乃與常鳥
之族集於闕下觀魏闕也
肉角馴毛宗於外園
麒麟肉角

馴順也毛謂獸也
養獸之處曰園
擾緇文皓質於郊
黑文白質騶虞也擾馴也
升

黃輝采鱗於沼
謂黃龍也
甘露宵零於豐草三足軒翥於

茂樹
二足瑞鳥也軒翥飛貌
若乃嘉穀靈草奇獸神禽應圖合

謀窮祚極瑞者朝夕坰牧
圖謀皆圖書之類言祥瑞朝夕見於坰牧也林外曰

坰郊外
曰牧
日月邦畿卓犖平方州洋溢乎要荒
日月以邦畿

之內奇異卓犖之瑞生於帝都
昔姬有素雉朱烏玄
洋溢于遠國也方州帝都也

秬黃粳

莫侯

之事耳

武王伐殷越裳獻白雉重譯而至
武王渡河中流火流為烏其色赤

詩誕降嘉穀惟秬惟秠秠黑黍也
韓詩外傳貽我嘉粳粳大麥也

君臣動色左右相

趨濟濟翼翼峨峨如也蓋用昭明寅畏承聿懷之福

寅敬也聿修也言嘉此瑞者蓋用
昭明敬畏修政安兆民以成多福

亦以寵靈文武貽

燕後昆覆以懿鑠

左傳遠啟疆曰辱見寡
君寵臨楚國鑠盛也

豈其為身

而有顓

專

辭也

成王所以封禪者豈為其身而為
專擅之辭蓋以光祖考之德也

若

然受之亦宜勤恁旅力以充厥道

恁思也旅陳也若
如此漢亦宜勤思

陳力以充封
禪之道也

啟恭館之金滕御東序之秘寶以流其

占

啟開也恭館置金滕之所金滕周公請命之書藏之于匱緘之以金東序東廂也秘寶則天球河圖

也此二物皆可以占驗受命之事故開而進之以流傳其占也

夫圖書亮章天哲也

亮信也章明也言河圖洛書至信至明乃天賜之以開賢哲也

孔繇先命聖乎也

繇道

也孔子之道先此而命於我者後聖之所孚契也

體行德本正性也逢吉丁

辰景命也

丁當也景明也言逢其吉瑞當此嘉辰乃王者之明命也

順命以創制

順天命以創立制度

因定以和神

治定作樂

答三靈之蕃祉展放唐

之明文

三靈天地人展廣也放唐謂堯也即放勳陶唐之謂明又令典也

茲事體大

而允寤寐次於聖心

此事體一人而信寤寐之次在聖心也

瞻前顧後豈

蔑清廟憚勅天命乎

言天子可以瞻前顧後封禪之事皆以光揚宗廟豈輕祖而難

告天乎蔑輕也清廟祖廟也勅告也伊考自遂古乃降戾爰茲作者七

十有四人

伊惟也遂古上古也戾至也此謂漢也自古作封禪者七十二君今漢有二是七十

四人

有不俾而假素罔光度而遺章

言前封禪之君尚假竹素以考

其跡未有告之以光明之度而遺其篇章者

今其如台而獨闕也

台我也如我安

可獨闕此禮哉

是時聖上固已垂精游神苞舉藝文屢訪羣

儒諭咨故宅

言天子以封禪之事謀於人也

與之斟酌道學之淵源

肴覈仁義之林藪以望元符之臻焉

斟酌飲也肴覈食也言與羣儒

故老求道德之淵源尋仁義之林藪以望符瑞之至亦如飲食以求其醉飽也肴肉也覈果也臻至也

既感羣后之讜辭又悉五繇

宙之碩慮矣五繇卜辭也碩大也

言感百官之正辭知其可矣將絳萬嗣揚洪輝奮景

又盡卜者之大慮以知吉祥絳使也與仵通炎盛也言將扇遺風播芳烈久而

愈新用而不竭汪汪乎丕天之大律其疇能亘之哉

唐哉皇哉皇哉唐哉律法也亘終也皇漢也言誰能竟此道惟唐堯與漢漢與唐堯

而已而

論贊
○公孫弘傳贊凡史傳之末作一贊以論傳內人之善惡亦論之意也

班固

贊曰公孫弘卜式倪寬皆以鴻漸之翼困於燕雀易漸

卦爻辭皆曰鴻漸言健翻以漸而進也史記燕雀馬知鴻鵠之志哉遠迹羊豕之間非

遇其時焉能致此位乎公孫弘少貧牧豕海上年四十餘乃學春秋六十對策拜

博士卜式以田畜為事是時漢興六十餘載海內又

牧羊十餘年後拜中郎安府庫充實而四夷未賓制度多闕上方欲用文武

求之如弗及始以蒲輪迎枚生見主父而歎息武帝聞枚

乘名廼以安車蒲輪徵之主父偃臨淄人武帝時上書闕下朝奏暮召入見謂曰公安在何相見之晚

羣士慕響異人竝出卜式拔於芻牧弘羊擢於賈

古

豎

桑弘羊洛陽賈人子故曰賈豎

衛青奮於奴僕日磾出於降虜

衛青

父鄭季與衛媼通生青其家皆奴畜之故云奴僕金日磾本匈奴休屠王子王降漢後悔昆邪王殺之將

其衆降日磾以父不降沒

斯亦曩時版築飯牛之朋

入官輸黃門養故云降虜

已

殷高宗夢傳說得諸傅巖版築之間甯戚飯牛居車下望桓公擊牛角而疾歌朋同類也

漢之

得人於茲爲盛儒雅則公孫弘董仲舒倪寬篤行則

石建石慶質直則汲黯卜式推賢則韓安國鄭當時

韓安國所推舉皆廉士賢於已者鄭當時字莊爲太司農每朝候上問說未嘗不言天下長者聞人之善進之唯恐後

定令則趙禹張湯文章則司馬遷相如滑稽

則東方朔枚皋

滑稽轉展隨俗也

應對則嚴助朱買臣歷數

則唐都落下閎

漢造漢太初歷方士唐都與馬益部者舊傳曰閎字長公巴郡閬中人也

明曉天文地理武帝時友人同縣譙隆薦閎待詔太史更作太初歷拜侍中辭不受

協律則李

延年運籌則桑弘羊

李延年中山人坐法腐刑善新聲為協律都尉桑弘羊以心計

為侍中

奉使則張騫蘇武將帥則衛青霍去病受遺則

霍光金日磾

帥漢書作率武帝病篤霍光曰如有不諱誰當嗣者上曰立少子君行周公之

事光讓日磾日磾亦讓光遂並受遺詔

其餘不可勝紀是以興造功業

制度遺文後世莫及孝宣承統纂修洪業亦講論六

藝招選茂異

六藝禮樂射御書數也茂異謂茂才異等

而蕭望之梁丘賀

夏侯勝韋玄成嚴彭祖尹更始以儒術進

蕭望之修齊詩事同

縣后倉梁丘賀從京房受易賀入說上善之以賀爲郎至少府夏侯勝從濟南伏生受尚書至長信少府韋賢修詩傳子玄成至丞相嚴彭祖字次公與顏安樂俱事昭孟公羊春秋有顏嚴之學爲太子太傅穀梁學有尹更始

爲諫議大夫

劉向王褒以文章顯將相則張安世

趙克國魏相邴吉于定國杜延年治民則黃霸王成龔遂鄭弘召信臣韓延壽尹翁歸趙廣漢嚴延年張敞之屬皆有功迹見述於後世參其名臣亦其次也

○晉紀論晉武帝革命

革命改也言改魏命歸於晉也

于寶

寶字令升新蔡人始以尚書郎領國史遷散騎常侍

史臣曰帝王之興必俟天命苟有代謝非人事也

謝代

興廢也

文質異時興建不同故古之有天下者栢皇栗

陸以前爲而不有應而不求執大象也

莊子曰獨不知至德之時

乎昔者栢皇氏栗陸氏若此之時則至治也有不自有其功也求不求其報也象法也言如此之君但執淳素之鴻黃世及以一民也
黃帝紹帝鴻氏故云鴻黃世及謂父子相承也

言此以一民之志也

堯舜內禪體文德也漢魏外禪順大名也

唐虞內禪無兵戈之事大名禪代之美名也

湯武革命應天人也高光爭

伐定功業也各因其運而天下隨時隨時之義大矣

哉

言各逐運數而天下之人
隨大矣哉言此義廣大也

古者敬其事則命以始

今帝王受命而用其終

尚書月正元日舜格於文祖
故云古命以始魏志咸熙二

年十二月禪位
故云今用其終

豈人事乎其天意乎

言終始不同豈
惟人事耶乃天

意也

○晉紀總論

自宣帝至愍帝令其善惡而論之

于寶

史臣曰昔高祖宣皇帝以雄才碩量應運而仕

謂魏武為

漢丞相時懿任文學掾

值魏太祖創基之初籌畫軍國嘉謀屢

中遂服輿軫驅馳三世

輿軫謂乘輿也三世謂武帝時為文學掾文帝時為丞相

長史明帝即位遷驃騎大將軍

性深阻有如城府而能寬綽以容納

行任數以御物而知人善采拔

言宣帝稟性深險如城府之固但能寬綽

容納數術也御使也

故賢愚咸懷小大畢力爾乃取鄧艾於農

隙引州泰於行役委以文武各善其事

鄧艾字士林義陽人典農

綱紀上計吏因使見太尉司馬懿懿奇之辟以為掾
遷尚書郎荊州刺史裴潛以州泰為從事司馬懿時
鎮宛潛數遣詣懿泰由此遂為上所知歷宛豫州刺
史艾善武而泰善文所以言能委任之各盡其事也

故能西擒孟達東舉公孫淵內夷曹爽外襲王陵

達在

新城故云西淵在遼東故云東曹爽俱受

神略獨斷

征伐四克

神略言智如神也四克謂克四方

維御羣后大權在已屢

拒諸葛亮節制之兵而東支吳人輔車之勢

輔車之勢謂吳

與蜀為援

軍旅屢動邊鄙無虧於是百姓與能大象始構

矣世宗承基太祖繼業

屢數也鄙亦邊也象法也言晉之興大法從此始立也繼

業謂相繼已

玄豐亂內欽誕寇外

中書令李豐太常夏侯玄謀廢大將

成之業也

軍故云亂內揚州刺史文欽鎮東大
將軍諸葛誕起兵在外故云寇外
潛謀雖密而在

幾必兆幾微也兆見也淮浦再擾而許洛不震咸黜異圖用

融前烈淮浦許洛即上所言內外也言皆黜異圖之人以明前業也然後推轂鍾

鄧長驅庸蜀鍾會鄧艾為將征蜀庸蜀地名三關電掃劉禪入臣蜀有

陽平關江關白水關為三關電掃言疾也天符人事於是信矣始當非常

之禮終受備物之錫天子命太祖為晉公加九錫禮又進公爵為王名器崇

於周公權制嚴於伊尹至於世祖遂享皇極世祖武帝也享

當也皇極天子位也正位居體重言慎法正位居體取中順之意重言即易重巽申

命之意仁以厚下儉以足用和而不弛寬而能斷故民

詠惟新四海悅勤矣

周易說之大民勸矣哉言新政寬嚴相濟也初受魏禪故云新

聿修祖宗之志思輯戰國之苦

言武帝修先祖欲伐吳之志輯修也

心不同公卿異議而獨納羊祜之策以從善為衆

腹心

謂近臣也異議謂張華王濬言伐吳便荀勗賈充以為不便也羊祜來上疏以國家之盛強臨吳之危弊不踰時尅可必也上納之為衆即此善謀便為衆多也故至於咸寧之末遂排

羣議而杖王杜之決

咸寧武帝年號排擯也擯棄荀勗賈充之議杖倚也倚王濬杜

預之決

汎舟三峽介馬桂陽

三峽山名桂陽郡名

役不二時江湘

來同

咸熙五年十一月命安東將軍王渾龍驤將軍王濬帥巴蜀之卒浮江而下太康元年四月王

濬鼓譟入於石頭吳王孫皓而縛輿餽降於夷吳蜀濬不二時謂不及二季也來同謂並歸晉也

之壘垣通二方之險塞掩唐虞之舊域班正朔於八

荒

夷平也壘垣軍壘也吳蜀俱帶江山故云險塞

太康之中天下書同文車

同軌

大康武帝年號也

牛馬被野餘糧棲畝行旅草舍外閭

不閉

餘糧棲畝謂禾穗遺於田畝如鳥之棲宿也舍宿也行旅草宿閭門不閉言無盜賊

民相

遇者如親其匱乏者取資於道路

資給也

故于時有天

下無窮人之諺雖太平未洽亦足以明吏奉其法民

樂其生百世之一時矣武皇既崩山陵未乾楊駿被

誅母后廢黜

山陵未乾言時近也駿為太傅作亂被誅后謂惠帝后也

朝士舊臣

夷滅者數十族尋以二公楚王之變

孟觀知中宮旨因譖二公欲行

廢立之事楚王瑋殺太宰汝南王亮太保衛瓘張華以二公既亡楚必專權使董猛言於后遣謁者李雲宣詔免瑋付廷尉瑋以矯詔伏誅宗子無維城之助而闕伯實沈之

郤歲構

毛詩宗子維城維連也言宗子連城封之以助王室也高辛氏有二子長曰閼伯次曰實

沈不相穆以干戈相討言諸王兄弟如之歲構年年有之也

師尹無具瞻之貴而

顛墜戮辱之禍日有

師尹大臣也

至乃易天子以太上之

號而有免官之謠

惠帝永康二年禪位于趙王倫倫以兵守衛上號曰太上皇改金墉

曰永安宮中書令繆播云太史案星變事當有免官天子

民不見德唯亂是聞朝

為伊周夕為桀跖

言朝居尊貴如伊尹周公之賢夕則屠戮為夏桀盜跖之惡

善

惡陷於成敗毀譽脅於勢利於是輕薄千紀之士役

姦智以投之如夜蟲之赴火

後漢書李寶勸劉嘉且觀成敗帝聞之謂鄧禹

日當是長安輕薄兒誤之耳左氏傳季孫盟臧氏口無或如臧孫紇于國之紀于紀謂犯綱紀也言輕薄小人役姦惡之智與時政相投如夜蟲之赴火不自知其有殺身之禍也內外混淆庶官

失才名實反錯天綱解紐

為惡者反獲善名是名實反錯也

國政迭

移於亂人禁兵外散於四方方岳無鈞石之鎖關門

無結草之固

漢書十六兩為斤三十斤為鈞四鈞為石無結草之固甚言無繫絆也

李

辰石冰傾之於荆揚

蜀賊李流攻益州發武勇以西赴益州兵不樂西征李辰因之

誑曜百姓以山都民丘沈為主石冰應之石冰略揚州揚州刺史蕪峻降

劉淵王彌撓之

於青冀

劉淵以離石之卒攻破諸郡縣自稱王王彌起兵攻東莞復攻青州撓亂也

二十

餘年而河洛爲墟戎羯稱制二帝失尊山陵無所

河洛

之都皆爲劉曜劉粲所破化成丘墟戎羯謂羌胡也
二帝謂懷帝爲劉曜所虜愍帝爲劉粲所虜俱蒙塵
於平陽歿於虜庭
故云山陵無所何哉樹立失權託付非才四維不

張而苟且之政多也夫作法於治其弊猶亂作法於

亂誰能救之故于時天下非暫弱也軍旅非無素也

彼劉淵者離石之將兵都尉王彌者青州之散吏也

離石縣名都尉官
也散吏謂無所主

蓋皆弓馬之士驅走之人凡庸之

才非有吳先主諸葛孔明之能也新起之寇烏合之

衆非吳蜀之敵也脫未爲兵

裳爲旗非戰國之器

也耒農器也自下逆上非鄰國之勢也然而成敗異

效擾天下如驅羣羊舉二都如拾遺芥非鄰國謂不

都洛陽長安也拾遺將相王侯連頭受戮乞為奴僕

而猶不獲后嬪妃主虜辱於戎卒豈不哀哉夫天下

大器也羣生重畜也愛惡相攻利害相奪其勢常也

若積水于防燎火于原未嘗甞靜也周禮以防止水

于原靜器大者不可以小道治勢動者不可以爭競

擾擾安古先哲王知其然也是以扞其大患而不有

其功禦其大災而不尸其利尸主百姓皆知上德之

生已而不謂浚已以生也

左傳子產寓書於子西以告宣子曰毋寧使人謂子

子實生我而謂子浚我以生乎浚取也

是以感而應之悅而歸之如晨

風之鬱北林龍魚之趣淵澤也

毛詩鬱彼北林風鳥也

順乎天

而享其運應乎人而和其義然後設禮文以治之斷

刑罰以威之謹好惡以示之審禍福以喻之求明察

以官之篤慈愛以固之故衆知向方皆樂其生而哀

其死悅其教而安其俗君子勤禮小人盡力廉耻篤

於家閭邪僻銷於胸懷故其民有見危以授命而不

求生以害義又况可奮臂大呼聚之以干紀作亂之

事乎

言人各守節義安可呼之以犯綱紀而為亂乎

基廣則難傾根深則難

拔理節則不亂膠結則不遷

理節謂政教有條理節度也膠固也言君布仁

惠之基深則人心固結而不可遷移也

是以昔之有天下者所以長久

也夫豈無僻主賴道德典刑以維持之也

言昔之有天下者中

間豈無邪僻之主哉而不以者有此以維持之也

故延陵季子聽樂以知諸

侯存亡之數長短之期者蓋民情風教國家安危之

本也

左傳吳公子札來聘請觀於周樂使工為之歌鄭曰其細已甚民不堪也是其先亡乎為之歌

齊曰表東海者其太公乎國未可量也故云知存亡長短

昔周之興也后稷生於

姜嫄而天命昭顯文武之功起於后稷

姜姓也嫄后稷母名后稷

周之祖先播殖百穀以養人故其詩曰思文后稷克文武承至仁之後故能成功

配彼天又曰立我蒸民莫匪爾極

毛詩周頌文也周公思有文德之后

稷功能配天極中也衆民蒙播殖之教皆因后稷而得中也

又曰實穎實粟卽有

邠

台

家室

毛詩大雅文穎垂穎也粟成熟也言后稷教人播黍稷有是成熟之盛也邠地名也

本后稷舊居堯以有功封之於邠使無變改室家也

至于公劉遭狄人之亂去

邠之豳身服厥勞故其詩曰乃裹糒糧于橐于囊

毛詩

大雅文公劉后稷曾孫也狄人侵之公劉不忍民與鬪乃棄邠裏糧之豳豳地名

陟則在嶽

復降在原以處其民

毛詩大雅文由原而升巘復下原言反覆以重民居也

以

至于太王爲戎翟所逼而不忍百姓之命杖策而去

之莊子曰太王亶父居豳狄人攻之太王曰與人之

兄居而殺其弟與人之父居而殺其子吾不忍也

子皆免居矣因杖策而去故其詩曰來朝走馬率西水滸至于岐

下毛詩大雅文謂亶父避狄周民從而思之曰仁人

不可失也故從之如歸市周人謂居之一年成邑二

年成都三年五倍其初太王止於岐下每勞來而安

集之故其詩曰乃慰乃止乃左乃右乃疆乃理乃宣

乃畝毛詩大雅文以至于王季能貊其德音貊猶故

其詩曰克明克類克長克君載錫之光毛詩大雅文

之顯至于文王備修舊德而維新其命故其詩曰惟

此文王小心翼翼昭事上帝聿懷多福

毛詩大雅文
小心翼翼恭

順之貌昭明也聿遂也懷來也言能恭敬遂來此多福也

由此觀之周家世積忠

厚仁及草木內睦九族外尊事黃耆養老乞言以成

其福祿也而其後妃躬行四教

黃耆黃髮老人也四教見禮記婦人教以

婦德婦言
婦容婦功

尊敬師傅服澣濯之衣修煩辱之事化天

下以婦道

師傳女師傳母也澣濯洗浣之衣也煩辱謂修女功

故其詩曰刑于

寡妻至于兄弟以御于家邦

毛詩大雅文

是以漢濱之女

守潔白之志林中之士有純一之德

毛詩漢有游女不可求思女雖

出游漢水之上人無犯者亦由貞潔使然毛詩肅肅
鬼置施于中林赳赳武夫公侯腹心言能化之使有

純一之德

故曰文武自天保以上治內采薇以下治外始

於憂勤終於逸樂

內謂諸夏外謂夷狄天保詩篇名以上下諸詩也

於是天

下三分有二猶以服事殷諸侯不期而會者八百猶

曰天命未至以三聖之智伐獨夫之紂猶正其名教

曰逆取順守保大定功安民和衆

三聖謂文王武王周公也

猶著

大武之容曰未盡善也及周公遭變陳后稷先公風

化之所由致王業之艱難者則皆農夫女工衣食之

事也

遭變謂管蔡流言也

故自后稷之始基靜民十五王而文

始平之十六王而武始居之十八王而康克安之

基本

也靜安也自后稷播百穀以始安民至文王十五世武王十六世加以成王則康王為十八世平定也居

有故其積基樹本經緯禮俗節理人情恤隱民事如

此之纏綿也

經緯猶織以成之節理謂以節度理人也恤憂也隱微也纏綿遠也言周家本

根之遠

爰及上代雖文質異時功業不同及其安民立

政者其揆一也今晉之興也功烈於百王事捷於三

代蓋有為以為之矣

烈盛也百王謂先代之帝王捷急也三代夏殷周也周之得天

下無所為而為之今言有為為之與周異也事在下文

宣景遭多難之時務伐

英雄誅庶桀以便事不及修公劉太王之仁也

多難謂四

方未靜也桀傲也言務在用兵伐其英雄誅其傲慢以便當時是以不暇於修仁恩也

受遺輔

政屢遇廢置故齊王不明不獲思庸

毫齊王芳也太甲既立

弗明伊尹放諸桐宮三年復歸于亳言在當時齊王不明不得如太甲反位也

高貴冲人不

得復子明辟

高貴鄉公髦也冲人幼小之稱昔周公攝成王政後復子明辟而高貴不得如

之二祖逼禪代之期不暇待三分八百之會也

二祖謂景

文是其創基立本異於先代者也

以上言建國本者薄與周異也又

加之以朝寡純德之士鄉乏不二之老

言臣民皆不古若也風

俗淫僻耻尚失所學者以莊老為宗而黜六經

黜退也

談者以處薄為辯而賤名檢

名檢聲名行檢也

行身者以放

濁為通而狹節信

時以放情濁行者為通而以節信者為褊狹

進仕者以

苟得為貴而鄙居正當官者以望空為高而笑勤恪

望空謂負虛名也是以目三公以蕭機之稱標上議

勤恪謂勤實政也以虛談之名蕭機蕭然忘機劉頌屢言治道傳咸每

糾邪正皆謂之俗吏劉頌武帝臣嘗訪治道悉心陳奏傳咸為左丞糾尚書郭啟赴

妹葬疾其倚杖虛曠依阿無心者皆名重海內若夫

文王日昃不暇食仲山甫夙夜匪懈者蓋共嗤黜以

為灰塵而相詬病矣尚書文王自朝至于日中昃弗皇暇食毛詩肅肅王命仲山甫

將之夙夜匪懈以事一人詬病詈疾之也由是毀譽亂於善惡之實情慝

奔於貨欲之塗選者為人擇官官者為身擇利言毀譽善

惡皆不知其實官人者惟私其所好而入官者亦便其身圖而已

而秉鈞當軸之士

身兼官以十數

秉鈞軸言執權平國家重事者更兼領十餘職

大極其尊小

錄其要機事之失十恒八九而世族貴戚之子弟陵

邁超越不拘資次

極其尊言秉鈞當軸也錄其要指兼官之事而言也勢家之子率多

不拘資次而超進

悠悠風塵皆奔競之士

風塵喻穢俗也

列官千百

無讓賢之舉子真著崇讓而莫之省

劉實字子真平原人疾時貪競

著崇讓論

子雅制九班而不得用

劉頌字子雅轉吏部尚書作九班之制以別尊卑

卑為裴頠所駁事不行

長虞數直筆而不能糾

傅咸字長虞為司隸校尉執正

彈糾多不見從

其婦女莊櫛織紵皆取成於婢僕

櫛梳也織紵理繒帛

也言皆委婢僕爲之

未嘗知女工絲枲

胥里

之業中饋酒食之事

也

禮記女子十年不出執麻枲治絲繭織紝組紃周易在中饋無攸遂毛詩乃生女子無非無儀酒食

是議言食祿之家婦人皆不知此事

先時而婚任情而動故皆不耻淫

逸之過不拘妬忌之惡有逆于舅姑有反易剛柔有

殺戮妾媵有黷亂上下父兄不之罪也天下莫之非

也又况責之聞四教於古修貞順於今以輔佐君子

者哉禮法刑政於此大壞如室斯構而去其鑿契如

水斯積而決其隄防如火斯畜而離其薪燎也

鑿契鑿也

國之將亡本必先顛其此之謂乎

左傳仲孫謂齊侯曰臣聞國之將亡

本必先顛而故觀阮籍之行而覺禮教崩弛之所由

後枝葉從之阮籍放蕩察庾純賈充之事而見師尹之多僻賈充

不依禮法官庾純後至克曰君行常居人前今何以在後純曰

有小市井事不了充之先為市魁故以戲答師尹大

臣也僻不正也考平吳之功而知將帥之不讓王渾與王濬

奏思郭欽之謀而悟戎狄之有釁郭欽上書曰戎狄

西北郡皆與戎居若百年之後有風塵之警胡騎自

平陽上黨不三日至盟津當及平吳之盛出北地西

河安定復上郡置馮覽傳玄劉毅之言而得百官之

翊平陽為便帝弗聽邪傳玄上書曰昔魏氏虛無放誕之論盈於朝野使

天下無復清議而人秦之病復發於今矣晉主顧

謂劉毅曰朕方漢何主對曰桓靈帝曰吾雖不及古

官錢入于官陛下賣官錢入私門以此言之殆不若也

核傳咸之奏錢神之論

而覩寵賂之彰

核考也傳咸上書以貨賂流行所宜深絕魯褒作錢神論左傳臧哀伯曰

官之失德寵賂彰也

民風國勢如此雖以中庸之才守文之主

治之

中庸謂非賢非愚守文謂守常

辛有必見之於祭祀季札必得

之於聲樂

左傳平王之東遷也辛有適伊川見被髮而祭於野者曰不及百年此其戎乎其禮

先亾矣季札來聘請觀樂使工為之歌陳曰國無主其能久乎

范熒必為之請死賈

誼必為之痛哭

左傳范熒反自鄢陵之役使其祝宗祈死曰君無禮而克敵天益其疾矣

愛我者惟祝使我速死無及於難范氏之福也漢書賈誼上疏曰可為痛哭流涕

又況我惠

帝以放蕩之德臨之哉

惠帝諱哀

故賈后肆虐於六宮韓

午助亂於外內其所由來者漸矣豈特繫一婦人之

惡乎

賈后惠帝后也六宮中宮也言六者取象坤數也韓午壽妻賈后妹也

懷帝承亂

得位羈於疆臣

承亂謂繼惠帝之亂也羈束也疆臣謂東海王越也

愍帝奔播

之後徒廁其虛名

洛陽傾覆秦王業避難於許豫州刺史閻鼎立以爲主後遷於長安

此徒廁天子之名而無其實也

天下之政既已去矣非命世之雄不

能取之矣然懷帝初載嘉禾生于南昌

太康五年八月嘉禾生南

昌九月懷帝生載年也

望氣者又云豫章有天子氣及國家多

難宗室迭興以愍懷之正淮南之壯成都之功長沙

之權皆卒於傾覆而懷帝以豫章王登天位

愍懷太子名適

賈后矯詔使小黃門孫憲害之淮南王名允趙王倫害之成都王名穎張方遣田徽殺之長沙王名乂河間王顥誅之言此數王俱見劉向之讖云滅亾之後誅戮懷帝始自諸王為天子

有少如水名者得之起事者據秦川西南乃得朋按

愍帝蓋秦王之子也得位於長安長安固秦地也而

西以南陽王為右丞相東以琅邪王為左丞相

琅邪王獻

南陽王保上諱業故改鄴為臨漳漳水名也由此推之亦

有徵祥而皇極不建禍辱及身

徵祥謂讖與嘉禾也禍辱及身謂被劉聰

所虜豈上帝臨我而貳其心將由人能弘道非道弘人

者乎

毛詩上帝臨汝無貳爾心言懷帝貳其心也

淳耀之烈未渝故大命

重集于中宗元皇帝

淳大也耀明也黎爲高辛氏火正有淳耀之德故其子孫昌也

烈業也渝變也晉承黎之後故云然言天下業未變故大命再集於東晉也

文選卷之十

文選卷之十

名類張方遺田徽殺之長沙王名以河

劉向之識云滅公之後

有少如水名者得之起事者據秦川西南乃得朋按

惠帝蓋秦王之子也得位於長安長安固秦地也而

西以南陽王為右丞相東以琅邪王為左丞相

琅邪王獻

上諱業故改鄴為臨漳漳水名也由此推之亦

有徵祥而皇極不建禍辱及身

徵祥謂識與嘉禾也禍辱及身謂被劉聰

天年業未變姑大命再兼故東晉也弘道非道弘人

照業也備變也晉承統之劉姑云然言

重兼于中宗元皇帝

五帝革軌之蘇姑其于經曰出軌大也駁則也蘇為高平月火

